

2 Korĩtu

Pauru okusiwa mijẽ Korĩtu wãnà kō pè maekwerà

Imovyvya

Aã kareta Janejare'e 'Āg omotekokuwa Pauru tokusiwa mijẽ Korĩtu wãnà kō pè maekwerà. Janejare'e teipe opyteporo Pauru wayvu mojenuarà rōmō toiko. Ajamã'ẽ Korĩtu wãnà kō mō kee e'i tite: "Ore ywesō Jesu remimono kō rōmō oroiko", e'i tite ojimojōvijã rã'āga kupa (2Kor. 11.5). Āmō, "Janejare'e remipyteporokwerà kō teve ore oroiko, Pauru vo", e'i rã'āga kupa ipi (2Kor. 11.12). Aepe jaa rē Pauru ojimokasiay javo okareta rupi imono. Kee e'i teve ikusiwa: "Jesu rupi janereko pyaukwerà ikatuay wete", e'i (2Kor. 3.6). Aã kareta rupi teve okusiwa manyvo toereko iporijau mǎe kō pátavōa rōmō.

Pauru ojikuwa ijupe kō

1 ¹Ije Pauru, Kiristu Jesu remimonokwerà. Janejare'e remimota rupi tē jane kō amotekokuwa ijayvu rē aiko ipi. Timoteu epyriwarà ve, Jesu koty rewarà teve a'e. A'e reve kareta akusiwa imonooka pejē ajupa.

Jesu koty rewarà kō pè āwī kareta akusiwa ajupa, Janejare'e omoe'e mǎe kō pè, mokope Korĩtu taa pè. Āmō, Jesu koty rewarà kō Akaja yvy rupiwarà kō pè teve akusiwa ajupa.^a

²Janeruwazu ikō tapenereko katu okatuaya rupi nē.

Tapepy'amopiryvypy katu ikō ipi nē. Janerōvijã Jesu Kiristu ve ikō a'evo tapenereko nē.

Jimomorijaua pè poromokasia rewarà

³Simoe'e ywete Janejare'e, a'e Janerōvijã Jesu Kiristu Ruu. A'e tē janeporijauesa jajimomorijau remē janerereko ipi. Janerōvijã ywete

^a 1.1 J.K.R. 18.1

tè rewarà mō janeporijauesa janerereko ipi. Āmō, janepy'amokasi jajimomorijau ipe jaiko remē. Janeāgyo remē teve a'evo janerereko. Janejare'e tè a'e rewarà mō a'evo janerereko ipi. ⁴Jajimomorijau remē, janemokasi janerereko ipi. Ajawyi āmō kō ojimomorijau remē, simokasi kō kuwa ipātavō kō āmē, jamāē ee kō remē ipi. Janejare'e janemokasi janerereko maekwerà rupi a'evo sireko kō āmē. ⁵Kiristu koty rewarà rōmō tè jane jaiko rewarà mō, ivo jē jajimomorijau jaiko ipi. A'evo remē janeporijauesa janemokasiy ipi. A'evo āmō kō siporijauesa teve Kiristu kasia rupi ereko kō ipi, jimomorijaua sikuwa remē. ⁶Ajawyi orojimomorijau maekwerà rupi Kiristu koty rewarà kō rōmō pejimokasità ky'y. Janejare'e pepy'amokasità penereko ky'y. Āmē oremokasia remē, pejē ve pemokasiyàtā āmē. Pejimokasiyàtā teve tapejirovija jē Janejare'e rē peiko, pejimomorijau ipe peiko remē. Āwitō ore orojimomorijau ipe oroiko remē, noropoi iwyi oroiko ipi, āwivotā pejē peiko. ⁷Ajawyi norojimonyi pene āmē oroiko. Noromoa'ui Jesu Kiristu rekoa wyi pepoia. Āwisō pejimomorijau ipe orevo jē peiko remē, napepoi iwyi peiko ipi. Pejimokasi jē peiko, orevo jē peiko. Orokuwa a'evo peikoa, eretārāgwerà kō.

⁸Ajawyi apota pekuwa manyvo Asia yvy pè oroiko maekwerà. Noromoa'ui oreikoa, oremomorijauvay 'ete kupa remē. Oremānōa kōrijō tè kō oromoa'ui mijā. ^b⁹Āwī tāwī jajukatā māē vo 'ejē ore ky'y. “Janejare'e teipō opota a'evo oreikoa”, oro'e, āwisō torojirovija ywete ee oroiko ky'y. Ajawyi kee oro'e ky'y: “Janejare'e tè omānō mē kō omomoera ipi. Ajawyi a'e rē kōrijō tè janerako'i ipi. Janekasia rē rōwā janerako'i ipi”, oro'e. ¹⁰Ajamāē Janejare'e tè orerereko katuoka oremomorijaua wyi ipi. Oremokatu jē orerereko, toromānō e'ā amātejē oroiko. Ajawyi a'e rē kōrijō tè orerako'i oremokasiarà rōmō oroiko. Aje, orerereko katu jētā orerereko ipi. ¹¹Ajawyi tapeporegeta oreupewarà mō Janejare'e pè ipi, toremokasi jē orerereko. Pejimoatypa remē tapeporegeta Janejare'e pè torerereko katu orerereko ipi. A'evo orepātavōtā pekupa āmē. Aja paire peenu aepo remē pirujē pemoe'e ywetetā Janejare'e āmē ky'y.

Pauru ooa rā omotee remēwarà

¹²Oreroryvay, Janejare'e ivo katu orerereko oroo oroposiko remē ipi rewarà mō. [A'evoa rupi, oromoawyjepa oreposikoa ky'y.] Orep'y'a katu ee oroiko āmē ky'y. Ivo katu oroiko peneve maekwerà rē ywesō orerory oroiko ipi. A'evoa oropota ipi. Ajawyi itōkō noreayvu teitetei itōkō pepyterà rupi oroiko ipi. Āmō taa wānā kō pyterà rupi teve a'evo oroiko ipi. Janejare'e kasia rupi tè a'evo oroiko ipi. Orotekokuwaway ee oroiko ipi. Orevote rōwā ajamāē a'evo oroiko. Janejare'e tè oremotekokuwaway

^b 1.8 1Kor. 15.32

rewarà mō tè a'evo oroiko. ¹³ Āwī kareta orokusiwa pejë mǎ'ē niwaypei peenu ky'y. Ajawyi pekuwa katutà imogeta āmē ky'y. Āmē tè niwaype'āi pejipy'amogeta ee peiko. Apota petekokuwavy ee peiko. ¹⁴ Age'e remē napetekokuwaive peiko. Ajamǎ'ē apota aā kareta rupi pejimotekokuwavy peiko ky'y. Āmē tè Janerōvijā Jesu uu mijē remē, āmē sōsi pejimoe'età orere āmē peiko ky'y. Āwīvo ve orojimoe'e tary ve pene Jesu rovake oroiko.^c

¹⁵⁻¹⁶ Ivo katu aiko maekwerà pekuwapa. Ajawyi ajipy'amogeta eoa rā rè aa penesa mǎ'ē. Apota ipe aa penesa mijā, toporomory Janejare'e ayvu rè pemotekokuwa. Masetonia vyv rupi aa remē, apota ipe aa penesa mijā. Ajaire, ajivy mijē ajo remē teve, apota ipe aa pekoty mijā, tepātāvō eoa repy rè pekupa, Juteja vyv kyty aa remē.^d ¹⁷ Ewari tè rōwā, “Aatā penesa”, a'e remē mijā. Eayvu teitete mǎ'ē rōwā ipe ije mijā!

¹⁸ Temirovija rōmō tè Janejare'e ekoi. Aje ywete e'i mǎ'ē teve. Ajawyi ije ve apota ivo katu aiko eruparà mō mǎ'ē. Ajawyi, “Aatā penesa”, a'e pejë remē, iwari mǎ'ē vo rōwā aiko. ¹⁹ Kee rewarà mō. Jesu Kiristu, Janejare'e Ra'yry aje ywete mǎ'ē tè. A'e rè ije poromotekokuwa aiko ipi. Āmō, Sirasi^e pemotekokuwa teve ee iko ipi. Āmō, Timoteu a'evo ve ekoi. Āwī tāwī wayvu nomoteei mǎ'ē tè Jesu. Uu ayvu rupi katuay ekoi ipi. Werovija katu ipi.^f ²⁰ Āwīvo ve Janejare'e, pe'lyte oporegeta mǎ'ē tè. Wayvu rupi katuay ekoi ipi. A'evoa sikuwa āmē. Ajawyi, “Ivo katuay wete”, ja'etā Kiristu rupi Janejare'e katua rè. A'evoa rupi ivo ve Janejare'e ywesō ekoia rè jaja'atā. ²¹ Janejare'e tè tesō okasia ome'ē jane, Kiristu revejë jaiko mǎe kō rōmō tijaiko. Janemoe'yi oupewarà rōmō tijaiko. ²² Oupewarà mojikuwapa oinō janere. O'Āg tè tesō oinō janepy'a pupe, [oupewarà mojikuwaparà rōmō]. A'e rupi pirujē wemime'ē rā omojikuwaoka janeupe, āwisō “aje ywete” tija'e ijupe ipi.

²³ Emǎ'ē. Janejare'e okuwa manyvore pō naai penesa jypy remē mǎ'ē. Epy'a pupewarà okuwa ipi. Poroporijauesa aiko rewarà mō tè naai penesa mijā. [Apota ipe aa penesa remē, ajamǎ'ē naai penesa.] Napotai poromosōka aiko. A'evoa Janejare'e okuwapa. ²⁴ Noropotai orojiayvumokasi pene oroiko, Janejare'e rè pejirovija mǎ'ē rè. Oropota poromokasi kōrijō penereko, tapenoryvay peiko ky'y. Oropota tapejimokasi jē Jesu rè pejirovijaa rè peiko āmē.

2 ¹ Ajawyi ka'e pejë. Napotai poromoāgyooka. Ajawyi tè naai rā'ī pekoty. ² Poromoāgyo sō remē, nemoryoka'āi kuwa pekupa mijā. Pejë kōrijō tè emoryoka pekupa mǎe kō rōmō peiko. ³ Ajawyi tè a'e kareta jypy remēwarà akusiwa amātejē imonooka peupe tapemǎ'ē ee. Pemotekokuwaa tè akusiwa, “Akuwa waiwererà wyi opoitā amātejē

^c 1.14 1Kor. 1.8 ^d 1.15-16 J.K.R. 19.21; 1Kor. 16.1 ^e 1.19 Siuvanō eu teve Sirasi pe.

^f 1.19 J.K.R. 18.5

kupa”, a'e peupewarà mō. A'evo remē tē aa pekoty remē, eroryvaytā pene āmē. Pejē āmē penoryvaytā ere, pejimoteepa rewarà mō. ⁴Napotai āwī kareta akusiwa imonooka mijā, epy'a pirai tē rewarà mō. Aja'otarē tesō kareta kusiwa. Napotai pemoāgyo mijā. Kee apota tapejē āwī kareta pemogeta remē: “Aje Pauru janerauvay. Ajawyi aepe okusiwa jane”, tapejē.

Nivoi maekwerà py'aky'a'oa rewarà

⁵Āwīvoa rē itōkō akusiwa imonooka tapemāē ee. Pepyriwarà mō waiwererà rē oposiko wyi, pejipy'amopirai tesō ee mijā. Ije ve āmē ajipy'amopirai epe aiko. Ajamāē pejē ywesō pejipy'amopirai peiko. Ajawyi tē aekwerà akusiwa mijā. Age'e ka'e pejē ky'y. Napotai pemomorijau karuaru nivoi maekwerà ereko ky'y. ⁶Pemomorijaupa ky'y. Tete ky'y. ⁷Waiwererà wyi opoipa. Aje, age'e ojimokasia 'arà okwa ky'y. Ajawyi ikatu ikō pereko ky'y nē, a'e pejē. Ajawyi orytā Janejare'e ayvu rē ky'y. Āmē tē nijāgyo karuaru'āi, waiwererà opoi paire. ⁸Ajawyi kee tapejē ijupe: “Aje oroau wyi tē, oromomorijau rā'ite nerereko, āwisō terejavu e'ā ky'y”, tapejē ijupe. Aepe pejē remē, okuwatā wauvaya āmē. ⁹A'evoa rōmō tē āwī kareta akusiwa imonooka pejē mijā. “Akusiwa ijupe kō maekwerà rupi katu pō eko'i kupa?” a'e tē pejē mijā. ¹⁰[Jypy remē itōkō ijaiwererà emoāgyoay wete āwijā mē.] Ajamāē age'e remē, opoipa waiwererà wyi ky'y. “Awyjepa” pejēma ijaiwererà pē. Ajawyi ije ve “awyjepa” a'e ijupe ky'y. Poroauvay wyi a'evo aiko. Kiristu rovake a'evo aiko. ¹¹Kiristu rovake poromoryoka mijē remē, āmē tē ājāgai rōvijā Satanasi nijamoe'eoka ywe'e tite'āi tojimokasi janere. Opota mijē janeaiwererà rē tijaposiko mijē ipi. A'evoa rē tijatekokuwa amātejē jaiko.

¹²Toraji taa pē aa Janejare'e ayvu e'eay Kiristu rewarà amojenu remē kō Janerōvijā ywete nomowaypei eupe taposiko a'e pē. Wenu katu eayvu āmē kupa. ¹³A'evo ipe remē kō ajikōtevē aiko, Titu naesai a'e pē rewarà mō. A'e janeretārā vo māē tē Titu. Ajawyi kō ajisyry te'ite aa Masetonia yvy kyty.^g

“Kiristu janemokasi rewarà mō jane ywesō jaiko”, e'i māē

¹⁴Ka'e Janejare'e pē: “Nekatuay wete, Kiristu revejē oroiko rewarà mō”, a'e ijupe. Aiwea 'arà kytywarà rōmō Janejare'e. Janemomoioka Kiristu mănōa rupi janererojivy janereru opyri. A'e tē orepyteporo oremono Kiristu rewarà toromojenu jenu erokwa jane kō pē. Ajawyi maipe kyty oroo remē, Kiristu rewarà ojikuwa āmē ky'y. Āwitō ipije katu māē pirujē taa rupi otau e'ē tē ipi, āwīvo ve Kiristu rewarà pirujē tena tena kō rupi ekoipa, oreremimojenuwerà rupi. ¹⁵Kiristu rupi oroiko

^g 2.13 J.K.R. 20.1

remẽ, Kiristu remime'ẽgwerà maevo sõ tite Janejare'e pè oroiko. ãwitõ ipije katu mãẽ, a'evo 'ejẽ Janejare'e pè oroiko. ãmõ kõ oromotekokuwa janerekoa pyaukwerà rè oroiko ipi. Werovija ypy mãẽ kõ oromotekokuwa oroiko. Noerovijaive mãẽ kõ teve oromotekokuwa oroiko. ¹⁶Waiwererà reve omãnotà mãẽ kõ pè inẽ mãẽ vo tè oreremimojenuwerà, nopotai enua kupa rewarà mõ. Ajamãẽ Kiristu rè ojirovijatà sikaepo mãẽ kõ pè ipije katu mãẽ vo oreremimojenuwerà ijupe kõ. Oreayvu rupi rõwã ãwĩ ayvu katuaya oromojenu ipi. Janejare'e ayvu rupi tè oromojenu erokwa. ¹⁷ãmõgwerà Janejare'e ayvu omojenu remẽ itõkõ karakuri repy rõmõ tè omojenu kupa ipi. Õõ rõwã põ ijupe kõ? Mosikoa e'e tè ijupe kõ. Na'evoi ore oroiko ajamãẽ. A'e kõ vo rõwã, karakuri repy rõmõ rõwã oromojenu erokwa ipi. Janejare'e tè oremonooka. Ajawyi tè ivo katu poromotekokuwa, Kiristu remĩgwai e'eay rõmõ toroiko. Janejare'e okuwa a'evo oroiko ipi.

“Penupi oreposikoa ojikuwa”, e'i mãẽ

3 ¹Ivo oroiko ypy remeve itõkõ orekuwa katu pekupa. Ajawyi ivo katu oroiko mãẽ noromome'u'ãi pejẽ ky'y. Orekuwapa pekupa. Ajawyi ãmõ kõ remikusiwarerà oremoe'ea rewarà napeeka'ãi. ãwĩvo ve penemikusiwarerà oremoe'ea rewarà ãmõ kõ noeka tite'ãi. ²Ivo peikoa rewarà mõ itõkõ oremoe'epa kupa ky'y. Penupi tè jane kõ oreposikoa okuwa. Janejare'e pepy'a moteepa ky'y. [Ajawyi tè jane kõ pirujẽ kee e'i: “Ikatu tè Janejare'e omono Pauru Korítu wãnà kõ pè tomojenu, ãwisõ toenu kupa. Aja paire ojimotee kupa ky'y”, e'i kupa.] Kareta jikusiwarerà vo 'ejẽ ãwĩvoa pepy'a pupe. ³Kiristu okusiwaoka mãẽ vo 'ejẽ pejẽ oreupe peiko. Kareta rè ojikusywa mãẽ rõwã ajamãẽ. Pepy'a pè poromoigooka mãẽ tè Janejare'e. A'e o'Ãg pepy'a pupe okusiwa mãẽ vo sõ tite. Ajawyi pekuwa Janejare'e pewarà rõmõ tè pejẽ peiko ky'y.^h

⁴Aje ywete Janejare'e rè orojirovija. Kiristu rè teve orojirovija. Ajawyi a'evo ore oroiko. ⁵Kee noro'ei pejẽ ipi: “Mosikoa ikatuay mãẽ orekasia rupi tè oroinõ ipi”, noro'ei pejẽ ipi. Aje Janejare'e kasia rupi tè a'evo oroiko. ãwĩ tè okasia ome'ẽ jane. ⁶Janejare'e tè oremotekokuwa o'Ãg rupi oremokasioka rõmõ, ãwisõ wayvu janereko pyaukwerà rewarà toromojenu erokwa. Kee e'i ore: “Eayvu Kiristu rewarà pemojenu remẽ, ajirovijaokatà jane kõ pè e'Ãg kasia rupi aiko ipi. Apy'amoteeoka kõtã imoigooka karuaru kõ epyri ãmẽ”, e'i. “Aepo jaa tè tapemojenu erokwa ãmẽ”, e'i ije.ⁱ

Nãwĩvoi wayvukwerà tãmõ Moisesi pè okusiwaoka maekwerà. Nijanemokatuoka kuwai jimomorijaua rã wyi. Nijanemoigooka kuwai Janejare'e pyri tijaiko, manyvo nijaiko'ãi sire'e upi rewarà mõ. Na'evoi

^h 3.3 Jisyry. 24.12; Jer. 31.33 ⁱ 3.6 Jer. 31.31; Epr. 8.9-10; 10.16

ijayvu pyau Jesu rewarà. Janejare'e 'Āg janemokatu janemokasioka Jesu rekoa rupi tijaiko. Janemoigooka karuaru Janejare'e pyri janerereko. Ajawyi Jesu rupi janereko pyaukwerà ikatuay wete ky'y.

Kiristu rupi janereko pyaukwerà rewarà

⁷ Kee jaa itōkō wayvu omojikuwaoka tāmō Moisesi kō pè remē. Takuru rē okusiwaoka wayvukwerà ivo tekoua rewarà Moisesi pè, [lyvytyrapyte 'aryvo tui remē.] Poroekwaso mǎě watypa Moisesi a'evo remē. Poroekwaso tesō Moisesi rova āmē, Janejare'e kasia renya rē. [Ajaire Moisesi werowyjy takurupe imogeta aty wasu kō pè remē], Isaeu kō nomǎě'āi kuwa ee. Ojirova 'ejē iwyi kupa. Mewe ova wyi ojisystry okwa iko. Ova yapea okwapa iwyi rire tē omǎě ee kupa ky'y. A'evo Janejare'e omojikuwaoka wayvukwerà aty wasu kō pè. Okasia rupi wayvu omojikuwaoka ijupe kō.^j ⁸ Tysi Kiristu rupi wayvu janereko pyaukwerà rewarà omojikuwaoka jane remē! Karamoe remēwarà wyi wetesi okasia omojisaoka. O'Āg tē tesō omoigeoka janepy'a pupe janemokasiarà rōmō, āwisō ijayvu rupi tijaiko ky'y.

⁹ A'evo itōkō Janejare'e ayvu karamoe remē noenui kupa. Upi noikoi sire'e kupa. Ajaire oity e'e 'ete kupa. Ajamǎě a'e omojikuwaoka ijupe kō remē, okasiaya omojisaoka ijupe kō. Age'e Jesu rewarà omojikuwaoka jane remē, o'Āg tē tesō omoigeoka janepy'a pupe ky'y. A'evo janemokasi tijapoi janeaiwererà wyi, ivo tijanerereko ky'y. A'evo remē ywesō okasia omojisaoka jane ky'y. ¹⁰ Karamoe remē okasia omojisaoka imojikuwa. Ajamǎě āwitō karamoe remē okasia omojisaoka remē, a'e ywesō ikasiay mǎě rōmō ekoi. Aekwery ve ywete si okasia omojisaoka age'e remē. ¹¹ Karamoe okasia omojisaoka remē, omojisaoka ke'iatu tē jane kō pè. Na'evoi age'ewarà ky'y. Awyje māerā tē omojisaokatā ky'y.

¹² Ajawyi age'e remē, orojimokasiay Janejare'e ayvu mojenu erokwa. Janereko pyau nopa'āi mǎě tē oromojenu ky'y. Ajawyi norokyjei oroiko ky'y. A'evoa orokuwa. ¹³ Jane āmē ovo rupi teve tāmō Moisesi rekoawerà wyi. Janejare'e kasia renya mewe okwapatā Moisesi rova wyi remē, ojiovaōvā kamisa pupe Isaeu kō wyi, tomǎě e'ā ee kupa, ova renya okwapa iwyi mǎě rē tomǎě e'ā kupa.^k ¹⁴ A'e kō noerovija ywe'ei. Ajawyi Janejare'e kasia renya rē nomǎě'i kupa. Aekwery vo jē tē ekoi ijeapyrerà kō age'e remē. Ajawyi nomogeta kuwa'āi Janejare'e remikusiwaokakwerà kupa. Nokuwai manyvo jaa tē kupa. Āwitō karamoe remē ekoi kupa, āwīvo ve ekoi age'e remē kupa. Nojimoteei kupa. Kiristu reve kōrijō tē jaiko remē tē kuwa Janejare'e kasia rē jamǎě. ¹⁵ Ajawyi age'e remē, Isaeu kō tāmō Moisesi remikusiwarerà omogeta remē, aekwery vo jē tē ekoi kupa. Notekokuwaive ee kupa. Ojiovaōvā

j 3.7 Jisyry. 34.29 k 3.13 Jisyry. 34.33

mā'ē vo 'ejē ekoi kupa.¹ ¹⁶Ajamā'ē Janerōvijā ywete rē jajirovija remē tē katu kōrijō jatekokuwa āmē ipi. Ojiovaōvā mā'ē vo rōwā jane āmē jaiko ky'y. Janejare'e janerovaōvāno maevo sō tite janerereko. ¹⁷Janerōvijā ywete rōmō Janejare'e 'Āg ekoi remē, ijayvu oike katu janepy'a pupe ky'y. ¹⁸Janeporakapa tesō ijayvukasia. A'e rupi i'Āg janepy'amotee ypy. Janepy'amotee jē janerereko, āmē ywesō eruparā mō tijaiko ky'y. Amē ywesō ikasia ojisaokatā janeupe. Jane kō omā'ē janere remē, Janerōvijā ywete katuaya rē omā'ē kupa āmē ky'y, ikasia rē teve.

“Ena turuwa vo 'ejē mā'ē jane”, e'i mā'ē

4 ¹Janejare'e oreporijausa wyi oreposikoa oupewarā ome'ē ore, āmō kō toromotekokuwa ijayvu katua rē. Ajawyi orojimokasi jē oroposiko ipi. Noropoi'āi oreposikoa wyi āmē oroiko. ²Noropotai jane kō poromoripe mā'ē. Āmō, jane kō nivoi ekoi remē. Āmō, jane kō tyvija rupi nivoi ekoi remē. Ava nivoi sō ekoi remē, oromojikuwaokatā āmē ipi. Noporomoripei oroiko ipi. Ore, aje ywete Janejare'e ayvu rē poromotekokuwa oroiko ipi. Noromoteei ijayvukwerā imomewa ipi. Ivo katu kōrijō poromotekokuwa oroiko ipi. Oropota ijayvukwerā rupi katu oroiko ipi. Amē tē jane kō pirujē Janejare'e rovake ivo oroiko mā'ē rē omā'ētā.

³Janejare'e ayvukwerā Kiristu rewarā oromojenu remē, jane kō mō kee e'i: “Noroenui emimojenuwerā”, e'i tite kupa. Noenu tari kupa rewarā mō tē aepo e'i kupa. Temiovapykwerā vo 'ejē ijupe kō ekoi āmē. Waiwererā kō revejē omānōtā kupa. ⁴Kee jaa oromojenu. Ikatuay wete Kiristu. Āwitō Janejare'e ywesō ikatuay wete ekoi, āwīvo ve Jesu ekoi Ta'yry rōmō, jaa oromojenu ijupe kō. Aepo jaa noenui kupa, yvy pewarā kō rōvijā rā'āga^m noenuoka tari ijupe kō rewarā mō. Omoripeoka kō aepo jaa toenu tare'ā kupa.

⁵Ore rōwā orojimoe'e oroiko poromotekokuwa rōmō. Jesu Kiristu rē kōrijō āmō kō oromotekokuwa, Janerōvijā ywete rōmō toerovija kupa. Penemīgwai kō vo 'ejē oroiko pemokasiarā kō rōmō oroiko. Jesu tē oremonooka pekoty toroo. Ajawyi a'evo oroiko. ⁶Karamoe remē itōkō pātōnusu kōrijō ike rupi mijā. “Toyape” e'i Janejare'e remē, āmē oyape ky'y. Aepo e'i maekwerā ywete janemotekokuwa Janejare'e ywesō ekoi rē. A'e rupi Janejare'e kasiaya sikuwa. Āmō, ikatuaya sikuwa teve, Kiristu rē jamā'ē remē.ⁿ

⁷Agyvo tē jane jaiko. Turuwa vo 'ejē jaiko. Janejare'e 'Āg rena vo jaiko. Ajamā'ē nijanekasi, yjy jinōgwerā vo tē. Ajawyi jajimokasitā remē, Janejare'e wyi kōrijō tē kuwa jajimokasi jaiko ipi. Janevote remē nijajimokasi kuwa'āi jaiko. ⁸[Oroo taa kō rupi poromotekokuwa remē,] orojimomorijauvay

¹ 3.15 Jisyry. 34.34 ^m 4.4 Ājāgai rōvijā pē aepo jaa tē. ⁿ 4.6 Jinō. 1.3

oroiko ipi. Ajamā'ē Janejare'e orepijarī oremoisyry oremomoriyawarà kō wyi ipi. Ma'e remē norokuwai manyvotà oreikoa. Ajamā'ē orepy'a katu jē ee oroiko. Āwīvo ipe oroiko remē, orojirovija jē Janerōvijā ywete rē oroiko. ⁹Mōa'ārōwā ipe noreresa tari mē kō ekoi. A'e kō oremomoriyawar ipe ipi. Ajamā'ē a'evo ipe orererekoa remē, Janejare'e nopoi'āi orewyi ipi. Oremokasi jē orerereko ipi. Oremomoriyawar ipe kupa remē, orokuve jē. ¹⁰Jesu vo ve norokyjei oremānōa wyi oroiko. Eevejē oroiko wyi norokyjei. Ajawyi ikasia rupi oroiko ipi. Āwīvoa āmō kō okuwatā, orere omā'ē kupa remē. ¹¹Oroposiko oroiko remē, ike yvy pewarā kō pē Jesu rewarā oromojenu jenu jē erokwa ipi. Ajawyi orejukatarā kō opota jē orejuka ipi. Ajamā'ē Janejare'e ayvu rupi tē a'evo oroiko. Ma'e rewarā mō. Āmō kō omā'ē ore, Jesu oremokasi jē orerereko remē. Āwisō orepirā omānō mē rā teipe remē, oremokasi jē toroiko. Ajawyi “aje” e'i ijupe kupa ky'y. ¹²Ajawyi oromānō 'atā tē maevo. Ajamā'ē nimanyvoi āwīvo oroiko remē, pejē Janejare'e ayvukwerā peenu rewarā mō. Pejē awyje peiko karuaru 'atā tē peiko, Jesu rē pejirovijapa rewarā mō. [Ajawyi epy'a katu jētā penewarā mō.]

¹³Oremomarama ipe kupa remē, nimanyvoi oreupe āmē. Noropoi'āi Janejare'e rē jirovijaa wyi. Karamoewarā kō vo rōwā oroikotā. Imojenua wyi ve noropoi'āi. Kee ojikusywa maekwerā rupi katu oroiko: “Ajirovija nere. Ajawyi neayvu amojenu aiko”, e'i maekwerā rupi katu.^o Janejare'e rē orojirovija rewarā mō ijayvu oromojenu erokwa ipi. ¹⁴Orokuwa Janejare'e tē omomoera Janerōvijā Jesu mā'ē. Ajawyi orokuwa ore ve Jesu reve oremomoeratā. Ajawyi penevejē orereraatā wena pē opyri tijaiko. ¹⁵[A'evoa rōmō ore orojimomoriyawar, Jesu Kiristu rekoa oromojenu peupe remē.] Oremomoriyawar rupi pejirovija ee ky'y. A'e rupi teve aty wasu kō ojirovija tary ve ee. Āmē ywesō Janejare'e poroereko katua okuwatā kupa. Āmē sitō a'e kō ve omoe'etā Janejare'e. Janereve omoe'etā kupa ky'y.

¹⁶Ajawyi norojimonyi 'ete āwīvo remē oroiko. Orojimokasi jē āwijā mē oroiko ipi. Āwisō orepirā opa mē rā teipe remē. Ajamā'ē orepy'a mokasi jē kō'ē jawe jawe Janejare'e ipi. ¹⁷Orojimomoriyawar ke'iatutā tē ipi. Āmō, orejimomoriyawar nipuku'āi teve. Āmē orojimomoriyawar paire, awyje tekoua pē oroiko pukutā jimomoriyawar e'āma pē awyje ky'y. Orejimomoriyawarawerā wyi wetesi orerepy rā. ¹⁸Ajawyi orejimomoriyawar rewarā rē norojimo'eai ipi. Janejare'e remime'e rā rē ywesō orojipy'amogeta oroiko ipi. Āwīvoa rā rē janerea nomā'ēive ipi. Age'e jamā'ē ee mā'ē ke'iatu tē. A'e rē kōrijō tē jamā'ē ipi. Ajamā'ē nijamā'ēive ee mā'ē, a'e sōsi awyje māerā tē.

Janepirā pyau rā rewarā

5 ¹Janepirā tapyina vo 'ejē rā'ī tē ike yvy pē. Jakājā remē, janereāgwerā jaitytā jaa ipi. Janepirā pyau rā Janejare'e werekopa

^o 4.13 Jīg. 116.10

wena pè, janeupewarà rã mō. Janepirà nopa'āi māerã tē ome'ētã jane ky'y. Jane kō reminōgwerà rōwã a'e. Janejare'e reminō tē a'e. ²Age'e remē, “Mape'ī pō?” ja'e janepirà yva pè tui mǎ'ē pè, japota katu rewarà mō. Janererekoiva ikewarà yvy pewarà. Āwitō janeyru pyau tē japota remē, āwīvo ve janepirà yva pewarà japota katu. ³Yva pè jaa remē, jane'āg kōrijō tē rōwã ekoitã a'e pè. Janejare'e janepirà pyau teve ome'ētã janeupe, jane'āg rena rōmō.

⁴Ike rupi jakuve jē remē, aã janepirà ikewarà ijamu 'ejē iko. Nowai ekoi. Nijapota ywe'ei janepirà ikewarà reity mijã. Ajamã'ē janepirà yva pewarà ywesō japota ky'y. Okājã mǎ'ē rekovijarerà rōmō awyje toiko. ⁵[Oreremikuwa rupi rōwã aepo oro'e pejē.] Janejare'e remikuwa rupi tē aepo oro'e pejē. Janerereko katupa teāmã a'e. O'Āg ome'ē teve janepy'a pè. A'e rupi sikuwa aje ywete janepirà pyau ajaire ome'ētã janeupe.

⁶Ajawyi nijajimonyi [kāramōwarà rã rē], a'evoa rewarà sikuwapa rewarà mō. Janepirà aã ikewarà ve sō jareko remē, nijaike kuwa'āi Janerōvijã ywete rena pè. ⁷Ajamã'ē age'e remē jamã'ē ee mǎ'ē rupi rōwã jaiko. Aje, jajirowija ee mǎ'ē rupi tē jaiko, āwisō nijamã'ēi epe ee remē. ⁸Janejare'e o'Āg oinō janepy'a pupe. Ajawyi sikuwa janepirà pyau oinōtã jane mǎ'ē. Ipyri jaikotã āmē ky'y, age'e remēwarà vo rōwã ky'y. A'evoa rã ywesō ikatuay wetetã āmē janeupe. ⁹Āmō, Janejare'e morya ywesō oropota, ike yvy rupi oroiko jē remē. Orokājã ipe remē teve. ¹⁰Kāramō pirujē jaatã Kiristu rovake jaiko. Āmē sōsi janemo'e'yitã ky'y. Manyvo jaiko ike yvy pè jaiko jē remē maekwerà rupi janemoepytã. Ivo rupi jaiko remē. Āmō, nivoi katu jaiko remē. Aekwerà rupi katu janemoepytã.^p [Ajawyi Janejare'e remimota rupi tē apota aiko mǎ'ē.]

“Janejare'e rē jajimory kuwa Kiristu rupi tē ky'y”, e'i mǎ'ē

¹¹Orokuwa Janerōvijã ywete ipojy wete mǎ'ē tē. [Ajawyi oromomojy wete oroiko ipi.] Ajawyi oroposiko ywete āmō kō motekokuwa rē oroiko ipi, Janerōvijã ywete rē tojirowija kupa ky'y. Janejare'e okuwa orep'y'a pewarà ipi. Ivo oroiko mǎ'ē okuwa teve. Āwīvo ve oropota pejē ve orekuwa pekupa. ¹²Norojimoe'ei penovake oroiko. Ajamã'ē oropota petekokuwa ivo oroiko mǎ'ē rē tē. Āmē ava mō oporegeta ai sō orere peneminu mō remē, napesi'āi āmē orewyi peiko. Pekuwatã ijayvuvaja kō. A'e kō ojimoe'e rã'āga iko ipi. Ivo maevo sō tite āmō kō rovake ekoi kupa ipi. Ajamã'ē ipy'a pewarà kō, soō āmē, nivoi ekoi. ¹³Āmōgwerà, “Eawyry mǎ'ē tē Pauru kō”, e'i tite kupa. Ajamã'ē Janejare'e ayvu e'ey rewarà mō tē notekokuwai mǎ'ē vo 'ejē oroiko. Ajamã'ē orotekokuwavay oroiko mǎ'ē tē ore. Ivo tekoua rē tē oroposiko pemotekokuwaarã rōmō oroiko ipi. ¹⁴Pemokasia

^p 5.10 Ajare kee e'i Pauru Piripu wānã kō pè: “Age'e akuwapa janevote rōwã ivo jaiko Janejare'e pè ipi. Janejare'e tē ivo janemoigooka ipi, Kiristu rē jajirowija remē tē.” Prp. 3.9

rè oroposiko oroiko, Kiristu janerauvaya rewarà orokuwa ipi rewarà mō. Ajawyi poroauvay teve poroerokoa. Janejare'e opota katu āwīvoa oroiko ipi. Orokuwa pe'ite omānō janerekovijarerà rōmō mā'ē. Ajawyi jane omānō mā'ē vo 'ejē jane, ivo jē. ¹⁵A'e omānō pirujē jane kō rekovijarerà rōmō, āwisō janeremimotarà rupi rōwā tijaiko ky'y. Aje, emimota rupi kōrijō tē tijaiko ky'y. A'evoa rā rōmō omānō. Ajaire opoera mijē omānō maire janerereko katuarà rōmō ky'y. ¹⁶Aje, ajaire āmō kō rekoa rè oromā'ē remē, kee noro'e teywete'āi: “Āwī ikatuay. Āwī ikatu sa'u kōrijō tē. Āwī āmē nikatu ywe'ei”, noro'e teywete'āi. Āmō, kwee remē Kiristu pewarà mō, kee oro'e tite: “Mirā te'e teipō āwī”, oro'e tite ijupe. “Ikewarà teipō”, oro'e tite ve. Ajamā'ē age'e remē aepo noro'ei ky'y. Orokuwa katupa ky'y. ¹⁷Kiristu revejē jaiko remē, jane ipyau mā'ē vo jaiko ipi. Janereko ppykwerà wekyīpa janewyi ity ipi.^q Aje Janejare'e janereko pyau oinō janere ky'y. ¹⁸A'evoa Janejare'e tē oinō janere. Āmō, janemojimoryoka wee Kiristu rupi ky'y, āwisō jimorypa rōmō rōwā ipe jaiko mijā remē. Āwīvo ve orerupi Janejare'e poromojimory wee ky'y, oromojenu ijayvu āmō kō pē remē. Oreposikoa teāmā a'e. ¹⁹Kee oro'e jane kō motekokuwa ipi: “Kiristu omānōma janerekovijarerà rōmō. Ajawyi aje Kiristu revejē jaiko remē tē katu Janejare'e ojimory mijē janere ipi. Ajawyi janeaiwererà rè nojipy'amogetai iko ky'y”, oro'e imotekokuwa kō ipi. Aepo e'i Janejare'e oreupe. Ajawyi aepo jaa oromojenu ipi. ²⁰Ajawyi Kiristu ayvu rupi emimojenuwerà rè poromotekokuwa oroiko ipi. Kee mā'ē vo oroiko. Āwitō Janejare'e ywete orerupi oporegeta, “Kee Kiristu ekoi”, toro'e pejē, a'evō oroiko. Ajawyi Kiristu ayvu rupi tē kee oro'e pejē: “Pepota Janejare'e ojimory pene, āwisō jimorypa rōmō rōwā pejē remē”, oro'e. ²¹Nuvei 'ete wete mijēsi Kiristu aiwererà mō ee. Ajamā'ē janerauvay rewarà mō pirujē janeaiwererà Janejare'e omō'y Kiristu rè, ivo teāmā mā'ē rè. Nivoi mā'ē vo Janejare'e wereko Kiristu tomānō janerekovijarà rōmō, janerereko katuarà rōmō. Ajawyi tē ivo katu mā'ē rōmō Janejare'e janerereko Kiristu revejē ky'y ipi.

6 ¹Ore Janejare'e reve oroposiko emīgwai kō rōmō oroiko ipi. Ajawyi kee oro'e pejē. Janejare'e penereko katuy wete okatuaya rupi. A'evoa wyi tapepoi ywe'e tite e'ā ikenē! oro'e pejē. ²Kee e'īpa Janejare'e ikusiwaoka:

“Age'e 'arà apota penereko katua rōmō.

‘Oreporijauesa rejupa’, pejē ije remeve aenu.

Poroporijauesa āmē”, e'i maekwerà.’

Ajawyi tapejapyaka katu ikenē! Janejare'e age'eve ywete opota pemokatupa. [Ajawyi tapejimokatuoka ikō ijupe nē, oro'e pejē. Age'eve ikō tapejirovija katu nē, oro'e pejē.]

^q 5.17 Janereko aiwerà pewarà mō janereko ppykwerà eu. ^r 6.2 Isa. 49.8

“Ore ywesō noreporijau i mǎe kō rōmō oroiko”, e’i mǎē

³Orojimokasi ivo katu kōrijō oroiko oreposikoa rupi, “nivoi mǎē” tojimo’y e’ā oreposikoa rē. Noropotai orerewarā mō ava mō noerovijai orereminuwerā. ⁴⁻⁵Pekuwa manyvo oroiko remē, ivo jē oroiko ipi. Orojmomorijau ipe oroiko Janejare’e remīgwai kō rōmō remē, ivo jē tite oroiko ipi. Oremomarama tarepe orerereko kupa remē, “Moko tjanererekoa nē kupa”, oro’e kōrijō ipi āmē. Āmō, waypete ipe oreposikoa remē, norererekoivai oreposikoa. Kee tesō ipe orerereko kupa ipi. Orenōpā nōpā ipe kupa. Āmō, jimopā’āga pupe oremono ipe teve kupa. Āmō, atry oremomarama tarepe orereko ipi. Āmō, mōa’ārōwā oreposikoa ipe remē, norojimoavai tesō orekane’ōyo rōmō oroiko. Noroke katui teve tesō oroiko. Āmō, amyay oroporara tesō teve ipe oroiko ipi. A’evo ’evo tesō ipe oroiko remē, ivo jē tesō āmē oroiko ipi. Āwīvo oroiko wyi orojikuwa Janejare’e remīgwai e’e kō rōmō tē oroiko.^s ⁶Aje, kee jaa orojikuwa. Oterē jē e’ete ivo oreikoa rē. Āmō, orotekokuwaway Janejare’e ayvu rē oroiko. Āmō, norojikōtevēi āmō kō motekokuwaa rē oroiko ipi. Ojavy javy kupa remē, ikatusa rupi oroereko katu kō jē āmē ereko kō ipi. Āmō, noroporegeta ai nivoi mǎe kō pē teve ipi, [oremoaiarā kō teipe remē]. Janejare’e Āg orepy’a pē ekoia rupi oroiko ipi. Āmō, aje poroauvaya rupi orojikuwa Janejare’e remīgwai e’e rōmō oroiko. ⁷Āmō, aje ywete oroporegeta ipi. Āmō, Janejare’e kasia orereve ekoi ipi. Āmō, ijayvukwerā rupi katu oroiko ipi. A’evo oroiko mǎē rupi oromojikuwaoka aje ywete Janejare’e ayvu. Āmō, oroovajarī oporegeta ai ijayvu rē mǎe kō oroiko ipi. ⁸Āmōgwerā oremoe’e ywete orerereko kupa. Āmōgwerā ajamǎē orererōarō kōrijō iko kupa. Āmōgwerā oporegeta ai tesō orere kupa ipi. Āmōgwerā oporegeta katuay orere kupa ipi. Āmōgwerā, “Poromoripe mǎe kō”, e’i oreupewarā mō ipi, āwisō poromoripearā kō rōwā ipe ore oroiko remē. Aje, oroporegeta katu mǎe kō tē ore. ⁹Norekuwai rǎāga tē kupa, noenu tari oreayvu kupa rewarā mō. Ajamǎē pirujē orekuwa ipe kupa. Āwisō opota ipe oremomarama kupa remē, oroiko jē oroiko āmē. Āmō, mape remē oremomorijau ipe kupa ipi. Ajamǎē noromānōive. ¹⁰Āmō, mape remē oremoāgyooka ywete ipe kupa ipi. Oremoai epe teve kupa ipi. Ajamǎē noropi orerorya wyi oroiko. Nimoma’ei mǎe kō vo ipe oroiko. Ajamǎē atry kō oiko karuarutā Janejare’e pyri oreremimojenuwerā rupi. Aje, Janejare’e pewarā kō rōmō tē oroiko. Ajawy imoma’e ywete mǎe kō vo ’ejē oroiko. Oremoma’e mō ve ywete nuvei epe oreupe. Ajamǎē ore ywesō pirujē noreporijau i mǎe kō rōmō tē oroiko, [Janejare’e pyri oroiko karuarutā rewarā mō.]

¹¹Pirujē aepo oromome’u pejē, eremiau kō. Aje, orepy’a pē tē poroauvay oroiko. ¹²Manyvore ywete norerau ywe’ei pekupa, āwisō ore

^s 6.4-5 J.K.R. 16.23

jě tite poroauvay ipe remē. ¹³Aje ywete poroauvay oroiko ipi. Ajawyi ikatusa rupi oroporegeta pejë ipi. Āwitō eākarā pè ikatusa rupi aporegeta kuwa, āwīvo ve aporegeta pejë ipi. Āwīvo ve tapeporegeta ore. Pepy'a pè ikō orerau katu pekupa nē, oro'e pejë.

“Tijajireko katu poropy'amoky'a mā'ē wyi jaiko”, e'i mā'ē

¹⁴Janejare'e noerovijai māe kō vo rōwā tapeiko ipi. Kee rewarā mō. Noerovijari māe kō tē ojee ekoi rewarā mō. Ajawyi ivo māe kō nivoi māe kō nojimoje'a'āi kuwa. Āwitō aryvo tē ekoi mā'ē no'ā'āi kuwa pātō rupi iko ipi, āwīvo. ¹⁵Āwitō Kiristu ājāgai rōvijā reve nojisu'u'āi 'eteay kuwa ojeeve iko. A'evo ve Jesu koty rewarā kō noerovijai māe kō reve nojisu'u'āi. ¹⁶A'evo ve Janejare'e pewarā, ijarā rā'āga jimoātāgwerā reve ovo rupi tē ojiwyi kupa. Jane Janejare'e retā vo 'ejē jaiko, jajirovija ee māe kō rōmō. I'Āg janepy'a pupepa ojimoena iko ky'y. Ajawyi aepo a'e pejë. Kee jaa itōkō Janejare'e e'i ikusiwaokapa amātejē karamoe remeve:

“Ere ojirovija māe kō pytery pè ajimoenatā, eeve kō taiko.
Ijare'e kō rōmō tē aikotā.
Eupewarā kō rōmō ekoitā āmē kupa”, e'i maekwerā.^t

¹⁷Kee e'i teve Janerōvijā ywete:

“Tapejimowaite nivoi māe kō wyi.
Eko kō rupi tapeiko e'ā peiko.
Pepy'amoky'a mā'ē wyi ikō pejireko katu peiko nē.
Āwīvo peiko remē, poroerekotā eupewarā kō rōmō āmē”, e'i maekwerā.^u

¹⁸Āmō, kee e'i:

“Penuu rōmō aikotā.
Pejë āmē era'yry kō rōmōtā tē peiko. Āmō, erajyry kō rōmōtā tē peiko”, e'i Janerōvijā ywete, a'e ywesō ikasiay wete mā'ē rōmō tē ekoi mā'ē.^v

7 ¹Ejimorypa katu kō, janeupewarā mō tē aepo e'i. Ajawyi tijajipy'aky'a'ooka Janejare'e pè jaiko ipi. Pirujē janepy'amoky'a mā'ē wyi tijapoi jajireko katu ipi! Janejare'e simomojy wete jaiko ipi. Āwitō Janejare'e aiwererā naikoi 'eteay wete mijēsi ee, āwīvo tijaiko ikoty rewarā kō rōmō jaiko.

^t 6.16 1Kor. 3.16; 6.19; Tek. 26.12; Esek. 37.27 ^u 6.17 Isa. 52.11 ^v 6.18 2Sa. 7.8,14; Isa. 43.6; Jer. 31.9

Korītu taa wānà kō rē Pauru rorya rewarà

²Kee a'e teve pejë. Oropota orerau mijē pekupa. Noporomojaiwei itōkō penereko ipi. Noporomoripei teve penereko ipi. Ivo katuay itōkō poroereko penereko ipi. ³“Nivoi peiko” na'e'i ajamā'ē peupe. Kee a'epa itōkō pejë: “Poroauvay aiko. Awyje nopi'āi poroauvaya. Jaiko jē jaiko remeve, penevejē oroikotà. Āmō, penevejē oroikotà, ajaate oromānōtā”, a'epa itōkō pejë. Aepo a'e jē tē. ⁴Ajawyi najipy'amopirai'āi pene aiko. Eroryvay jē pene aiko. Aje ywete Janejare'e ayvu rupi peikoa akuwa. Ajawyi poromoe'e wete jane kō rovake aiko ipi. Ajimomorijau ipe aiko remeve erory jē pene aiko ipi.

⁵Āmō, kee a'e pejë. Masetonia yvy pē oroiko remēwarerà ve norekane'ōyoi tesō oroiko. Pirujē taa kō rupi oremomorijau ipe kupa ipi. Āmō kō oreayvuvaja vaja 'ete teve ipe ipi. Orojimonyi wete ipe amē oroiko ipi.” ⁶Ajamā'ē Janejare'e oremoryoka jē oremokasioka orerereko. Āwīvo Janejare'e poromoryoka jē poroereko ipi. Titu omuroka [penena pe wyi] orekoty oremoryoka oremokasioka. ⁷Ajamā'ē ivāea rewarà mō kōrijō tē rōwā orerory oroiko ipi. Penewarà omojenu oreupe, kee jaa: “Korītu wānà kō epy'amokasioka tesō erereko”, e'i oreupe. Ajawyi tē orerory aepo renu amē ipi. Āmō, “Opota omā'ē nere kupa. Āmō, ijāgyo teve nerereko ai maekwerà rē kupa. Āmō, opota mijē ojimory nere kupa”, e'i penewarà mojenu ore Titu. Aepo jaa aenu remē ywesō eroryvay aiko ky'y.

⁸Akuwa eremikusiwarerà rē pemā'ē remē, peāgyo tite ee pemājā mijā. Ajawyi, “Moma'e rā sōpōkō akusiwa tite!” a'e mijā. Āwī kareta akusiwa imonooka tapemā'ē ee, tapeāgyo ywe'e tē pejimosioka ee pemājā. Ajamā'ē itōkō eremikusiwarerà rupi pejimotekokuwa tē peiko ky'y. Ajawyi napeāgyo'āi ee ky'y. ⁹Ajawyi age'e si eroryvay aiko ky'y. Poromosioka peaiwererà rē rewarà mō rōwā ajamā'ē erory aiko. Kee rewarà mō tē erory aiko. Pejimosioka peaiwererà rē remē, peityppyipaoka Janejare'e pē peaiwererà ky'y rewarà mō tē erory aiko. Pepoipa peaiwererà wyi amē ky'y. Janejare'e tē a'evooka penerekooka. Ajawyi tē eroryvay aiko ky'y. Akuwa noporomoai kareta akusiwa maekwerà rupi aiko. ¹⁰Ajawyi kee a'e pejë. Janejare'e janemosioka janeaiwererà rē remē, kee ja'e ipi: “Moma'e rā sōpōkō a'evo aiko mijā!” ja'e ipi. Jajimome'u Janejare'e pē janeaiwererà reityppyipaoka ipi amē ky'y. A'evoa rupi Janejare'e janemokatu ky'y. Ajawyi nijajimosioka pānēi janeaiwererà rē jaiko ipi. Ajamā'ē noerovijai mae kō ojimosioka ipe remē, ojimosioka jē ipe tē iko kupa. Noityppyipaoka waiwererà kō Janejare'e pē remē, ijaiwererà kō revejē omānōtā kupa amē ky'y. ¹¹Aā tapekuwa. Pejimosioka mā'ē ikatu tē Janejare'e pē, napejimosioka pānēi rewarà mō. Emā'ē. Kuise'ē pejimosioka

^w 7.5 2Kor. 2.13

peaiwererà rè peiko. Kuise'ẽ teve pepota ywete peaiwererà reitypypioka ijupe. ãmẽ nivoi ekoi mãẽ rè pemã'ẽ remẽ, kee pejẽ ky'y: "Aje, ipojoy ai tẽ awĩ rapijarà janepytery pẽ ekoi remẽ!" pejẽ ky'y. Ajawyi pemoisry pepytery pe wyi ky'y. Ivo katu ekoi mã'ẽ kõiřõ pepota katu ky'y. Erekaray wete pekupa ãmẽ ky'y. Awĩvo peiko rewarà mõ, ivo peikoa pemojikuwa jane kõ rovake ky'y.

¹² Awĩvo kareta akusiwa tapemã'ẽ ee. Nivoi mã'ẽ waiwererà toityoka rewarà mõ ywesõ rõwã akusiwa kareta. ãmõ, temimoai pãtavõa rewarà mõ ywesõ rõwã. Kee rewarà mõ ywesõ akusiwa pejẽ. Napekuwa ywe'ei maevo orerau pekupa mijã. Ajamã'ẽ oreayvu rupi peiko remẽ, Janejare'e omojikuwaoka orerauvaya peupe ky'y. ¹³ Ajawyi oreroryvay oroiko ãmẽ ky'y. Orep'y'a piryvpy katu teve pene oroiko ky'y.

ãmõ, kee rewarà mõ teve orerory oroiko. Titu peneve ekoi remẽ itõkõ ojipy'amokasiay iko. Ajaire uu remẽ, oryvay penewarà omojenu oreupe remẽ. Ajawyi a'evoa rè oreroryvay teve oroiko. ¹⁴ Titu nooive pekoty remeve, kee oro'e amãtejẽ ijupe: "Aje, Korĩtu wãnã kõ ikatu nererekotã, ivo katu tẽ kupa rewarà mõ", oro'e ijupe. Aje ywete oro'e ijupe. Awitõ peupe norewari oroiko ipi, awĩvo ve Titu pẽ norewari oroiko ipi. ãmẽ Titu oo pekoty ky'y remẽ, napejavyi oreayvu oro'e ijupe maekwerã. Upi katu tẽ peiko. Ivo katu tẽ pereko Titu ereko. ¹⁵ Titu penaupay teãmã penereko. Ajawyi oja'a jẽ pene iko ipi, kee javo: "Ivo katu erereko kupa. Ojapyaka katu teve eayvu rè kupa. Upi katu ekoi ãmẽ kupa. ãmõ, emomojy kupa", e'i oreupe, oja'a pene remẽ. Ajawyi age'e ywesõ Titu penaupay ky'y. ¹⁶ Ajawyi najipy'amopirai 'ete pene aiko ky'y. Eroryvay a'evõ peiko rewarà mõ aiko.

Iporijau mãe kõ pãtavõa rewarà

8 ¹ Eretãrãgwerã kõ, oromome'utã peupe Masetonia yvy wãnã kõ rekoawerã kõ, Jesu koty rewarã kõ rekoawerã kõ. Aje, Janejare'e wereko katu kõ okatuaya rupi ipi, awisõ agyvo toiko kupa. ² Ojimomorijauvay ipe kupa remẽ, ory jẽ iko kupa ipi. Nimoma'ei epe teve kupa remẽ, poroavay jẽ iko kupa ipi. Ajawyi opota katu ãmõ Jesu koty rewarã kõ opãtavõ kupa ipi. Okuwapa Jerusarẽ taa wãnã kõ iporijau remẽ kupa. A'evõ rewarã mõ, okarakuri mõ omonooka jẽ tesõ ijupe kõ, awisõ nimoma'ei epe kupa remẽ ipi. ³ Nokãte'ãi 'ete okarakuri me'ẽ kupa ipi. Ava mõ, "Karakuri mõ pemonooka", ne'i ijupe kõ mijã. Ovõte omonooka kupa. Ome'ẽ takatua rupi tẽ ome'ẽ ijupe kõ imonooka kupa. Aje ywete a'evõ ekoi kupa. ⁴ Kee e'i oreupe kupa: "Ore ywete oropota katu orekarakuri mõ oromonooka Jerusarẽ wãnã kõ pẽ, Janerõvijã koty rewarã kõ pãtavõarã rõmõ", e'i oreupe kupa ipi.^x ⁵ Kee oro'e tite orojipy'amogeta aepe e'i kupa

^x 8.4 Rom. 15.26

remē: “Kejōgà teipō karakuri ome'ētà kupa”, oro'e tite. Ajamā'ē ome'ē ywete oreupe kupa. Opota teāmā Jesu Kiristu remimota rupi ekoi kupa rewarà mō a'evo ekoi kupa. Āmō, oreayvu rupi teve ekoi kupa. Janejare'e remimota rupi a'evo ekoi kupa.

⁶ Kee rewarà mō aepo amome'u pejē. Titu pepytery pè ekoi remē itōkō kee e'i pejē: “Pekarakuri mō pemokatu tapemonooka ajaire ojimomori jau mēe kō pè”, e'i pejē. Ajawyi Masetonia wānà kō rewarà oroenu remē, kee oro'e Titu pè: “Korītu wānà kō poroauvay iko ipi! Ekwa teremokasi kō jēsi a'evo toiko jē kupa. Epātavō kō okarakuri moatya rē”, oro'e ijupe imono. ⁷Pejikuwa Janejare'e rē pejirovija mēe kō rōmō peiko. Āmō, ivo katu ayvu pemojenu mēe kō rōmō pejikuwa peiko. Āmō, Janejare'e ayvu rē petekokuwavay teve peiko. Āmō, pejimokasi mēe kō rōmō peiko. Āmō, orerauparà kō rōmō teve peiko. A'e a'evoa rē pejikuwa peiko ipi. Ajawyi karakuri me'ēa rē ikō tapejikuwa teve peiko nē, oro'e pejē. Poroauvaya rupi a'evo tapeiko, oro'e pejē.

⁸ Kee na'ei pejē ajamā'ē: “Eayvu rupi eremikuwa rupi tapeiko ikenē!” na'ei pejē. Kee a'e kōrijō tē: “Masetonia wānà kō nokāte'ai okarakuri rē ime'ē iporijau mēe kō pè”, a'e tē. Āwīvo sō pekarakuri peme'ē remē, pejikuwatā aje poroauvay mēe kō rōmō peiko, a'e tē pejē. ⁹ Janerōvijā Jesu Kiristu itōkō janerauvay. Kee itōkō ekoi. Nimoma'ei mēe vo rōmō uu ojimojane janepytery pè, āwisō imoma'e ywete mēe rōmō teāmā ekoi remē. ^y Pirujē wereko mēe rōmō teāmā ekoi remē. Poroauvay rewarà mō tē a'evo ekoi. [Janeupewarà mō ojimomori jauoka.] A'evoa rupi tē imoma'e ywete mēe kō vo 'ejē jaiko ipi.

¹⁰ Kee a'e ajipy'amogeta, pekarakuri peme'ē ojimomori jau mēe kō pè mēe rē. Jypy remē itōkō, pepytery pè aiko remē itōkō, a'evoa rā rē pejipy'amogeta peiko. Pejē ypy itōkō kee pejē ije: “Orekarakuri mō oromoatytā ime'ē Jesu koty rewarà kō ojimomori jau mēe kō pè”, pejē ije. Ajawyi a'evo peiko ypy. A'evo jē tē peiko. Pepota a'evo peiko rewarà mō tē a'evo peiko ipi. ¹¹ Ajawyi a'evo jē ikō tapeiko nē, a'e pejē. Tapenory jē ikō ime'ēa rē nē, a'e pejē. Peme'ē takatua rupi tē ikō tapeme'ē ajamā'ē nē. Tapeipi e'ā ikō ime'ēa rē, ajaate pemoawyjepatā ime'ēa. Kee jaa ikatu, agyvo. Pekarakuri ywete remē, kee javu sa'u tapeme'ē. Napekarakuri ywe'ei remē, kejōgà jē tapeme'ē. A'evo tapeiko ipi. ¹² Japota jame'ē takatu remē tē Janejare'e ory janere ipi. Mōa'ārōwā janekarakuri jame'ē remē, ikatute. Ajamā'ē nijanekarakuri sō remē, “Tome'ē jē ikenē”, ne'i jane. Ivo ve kejōgà jame'ē remē, ikatu teve Janejare'e pè āmē ipi.

¹³ “Tapejima'eme'ēma”, noro'ei pejē ajamā'ē. “Mōa'ārōwā jane kō tomoma'enō ikenē”, noro'ei pejē teve. Apota ojevo jē peiko mēe. ¹⁴ Akuwa age'e pemoma'e ywete peiko. Ajawyi ikatuay wete kuwa iporijau mēe kō

pepātavō remē mijā. Ajawyi pekarakuri, pemoma'e tapepē'o imono ijupe kō, a'e pejē. Āmē tē a'e kō āmō remē pejimomorijau remē, ivo ve omoma'e mō opē'o tary ve ime'ē pejē kupa, pepātavōarā kō rōmō ipi. Āwīvo peiko remē tē ojevo jē pemoma'etā āmē. Ava jē rōwā iporijautā āmē. ¹⁵Kee e'i itōkō ojikusiwa Janejare'e ayvu rōmō maekwerā rupi katu:^z “*Mōa'ārōwā mānā opyy imoaty mā'ē noapyrasai ajamā'ē. Āwīvo ve kejōgā tē opyy mā'ē pē oyte*”, e'i. Aepo e'i maekwerā rupi katu peikotā āmē ky'y.

Titu kō rewarā

¹⁶Age'e Titu ootā pekoty. Opota katu pemokasiay ipi. Janejare'e tē omokasi Titu, āwisō tapenauway. Ajawyi āwitō oropota pemokasi, āwīvo ve Titu opota pemokasia. A'evoa rē orerory mā'ē oromome'u Janejare'e pē. ¹⁷Ajawyi, “Nepota pō neo Korītu taa pē, a'e kō mokasia rōmō?” oro'e ijupe remē, “Ōō, apota”, e'i oreupe āmē. Opota katuay pemokasia rewarā mō, opota teāmā oo pekoty. ¹⁸Ajawyi age'e ootā pekoty. Āmō Jesu koty rewarā mō oromonotā upi. Oreretārā tē a'e. Jesu koty rewarā kō remimoe'e tē oromonotā upi mā'ē. Pirujē Jesu koty rewarā kō opota katu, oposiko katu Janejare'e ayvu e'eay Jesu Kiristu rewarā mojenua rē ipi rewarā mō. ¹⁹A'e kō tē opyteporo too orerupi, Jerusarē taa pē oro remē. Ajawyi karakuri Jesu koty rewarā kō remimoatykwerā oroeraa remē, ootā orerupi kupa. A'evoa rupi aje poroaua ojikuwatā. Aje, oropota ywete poropātavōa mojikuwaa teve. A'evoa rupi omoe'e ywetetā Janejare'e kupa. ²⁰Noropotai kee e'i tite āmō kō oreupewarā mō, mōa'ārōwā karakuri oroeraa remē: “Emā'ē. Āwī kō karakuri weraa remē, wekyitā karakuri mō oupe kupa”, te'i tite e'ā ore kupa. Aja rewarā mō tē oreretārā mō oroeraatā orerupi, tomā'ē orere karakuri orome'ēma remē. Āmē tē aepo ne'l'āi ore kupa. ²¹Oropota Janerōvijā rovake ivo katu oroiko ipi. Āwīvo ve oropota jane kō rovake ivo katu oroiko teve. Ajawyi a'evō oroiko ipi.^a

²²Āmō teve oromonotā Titu kō rupi. Oreretārā teve a'e. A'e iteetejē oroā'ā esa. Ajawyi a'evoa rupi orokuwa temirovija tē sikaepo. “Hoō” e'i katu mā'ē tē a'e. Ovote teāmā jane kō omokasiay ereko ipi. A'e remirovija katu teāmā pejē peiko. Ajawyi age'e si pejē pekuwatā ky'y. Age'e ywesō si opota pemokasia rōmō ekoi ky'y. ²³Ije tē Titu amonotā pekoty. Ereve oposiko iko mā'ē tē a'e. Āmō, oreretārā kō ootā upi pekoty mē kō pewarā mō kee a'e pejē. A'e Jesu koty rewarā kō remimonookakwerā tē. Kiristu rekoa rupi katuwarā kō tē a'e kō. ²⁴A'e kō pewarā mō kee a'e pejē. Oo pekoty kupa remē ikō tapereko katu kō ipi nē, a'e pejē. [Pekarakuri ikō tapemoaty imonooka upi kō iporijau mē kō pātavōa rōmō nē, a'e pejē.] A'evō peiko remē tē, pirujē Jesu koty rewarā kō okuwatā aje ywete

^z 8.15 Isaeu kō tekoe'āma rupi ekoi kupa remēwarā rē ojikusiwa. Jisyry. 16.18; Epr. 9.4

^a 8.21 P.Teko. 3.4

poroauvay mǎe kō rōmō tē peiko. Kee e'itā āmē kupa: “Pauru nomoe'e kō teywetei”, e'itā peupewarā mō āmē kupa.

“Tapemoaty amātejē penemime'ē rā”, e'i mǎ'ē

9 ¹“Pekarakuri peme'ē tijamonooka Juteja yvy kyty Janerōvijā koty rewarā kō pātavōa rōmō”, na'e'āi ky'y, aepe pekuwapa rewarā mō. ²Jypy remeve itōkō pepota pepātavō kō ipi. Ajawyi tē poromoe'e ywete Masetonia yvy wānā kō remikuwa rōmō. Kee a'epa ijupe kō: “Korītu taa wānā kō, mire'eay tē”, a'epa. “Akaja yvy pewarā kō a'e kō. Wāi āmō kwaray pe wyive opota Juteja wānā kō opātavō kupa”, a'epa peupewarā mō. Ajawyi “hoō” pejē katu ipi rewarā mō, okuwa a'evo peiko mǎ'ē kupa ky'y. Ajawyi a'e kō ve opota okarakuri mō ome'ē, ipātavōarā kō rōmō. ³Kee a'epa ijupe kō: “Akuwa Korītu wānā kō omoatypa amātejētā karakuri tisiraa jakwa remē”, a'epa ijupe kō. Age'e Titu kō amonotā pekoty erenone rupi, aje ywete tapemoatypa amātejē. Napemoaty ime'ē sō remē, poromoe'e pānē tē kuwa āmē. ⁴Kāramō Masetonia yvy wānā kō sō oo erupi pekoty remē, manyvo na'e'āi kuwa āmē ijupe kō, poromoe'e pānē tesō aiko remē. Pejē ve manyvo napejē'āi kuwa, “hoō” pejē katu oreupe paire. ⁵Ajawyi tē Titu kō amono amātejētā erenone rupi pemokasiarā rōmō mokope, karakuri penemime'ē rā moatya rē. Peayvukwerā rupi ikō tapemokatu karakuri āmē nē. Āmē tē avāe a'e pē remē, pemoatypa amātejētā karakuri erenone. Āwīvo remē tē peme'ē takatua rupi tē peme'ētā. Oroporanu rire rōwā peme'ētā āmē.

Temitā rā'āigwerā jaōtā mǎ'ē rē tē poromosā'āga mǎ'ē

⁶Kee a'e mǎ'ē rē pemā'ē esa. Ava mō sō pe'īpe'ī moma'eyva rā'āigwerā oōtā remē, ivo ve i'akwerā pe'īpe'ī teve omoaty ipi. Āmō, mōa'ārōwā oōtā remē, mōa'ārōwā teve i'akwerā omoatytā. A'evoa rē tapeja'a penemime'ē rā pemoaty remē. ⁷Tapejipy'amogeta rā'ī jēsi mapejō pō peme'ētā, pejāvijō jē. Aekwerā rupi tapeme'ē ajaire. Peme'ē takatua rupi tē peme'ētā āmē. Tapejimōarō e'ā ime'ēa rē peiko. Tapenoryvay ime'ēa rē peiko. A'evo jaiko mǎ'ē Janejare'e opota katu ipi. ⁸Janejare'e ywesō kuwa mōa'ārōwā ome'ē penemiporu rōmō, tapemosāi jane kō pē erokwa ipi. Nopa'āi kuwa pepo pewarā pemosāi ywete ipe remē. ⁹Ajare kee ojikusywa maekwerā rupi tapeiko: “*Kejavōigā rōwā iporijau mǎe kō pē ome'ē moma'e ipi. Ivo poroereko karuaru ipi mǎ'ē*”, e'i maekwerā rupi katu tapeiko.^b

¹⁰Āwitō Janejare'e tē moma'eyva rā'āigwerā ome'ē janeupe tijaōtā ipi. Āwīvo janeremi'ōvānō ipi. Omoy katu janeremi'ō janeupe ipi. Āwīvo ve āmō kō peporijauesa remē, Janejare'e omoy katutā pemoma'e kō toy katu jē pejē. Napeporijau'āi poropātavōa rupi peiko. Āmē ywesō Janejare'e

^b 9.9 Jīg. 112.9

omoy katutà pejë.^c ¹¹Aje, Janejare'e pemoma'enõ ywetetà. ãmẽ tẽ oiko jẽtã penemime'ẽ rã. Kee javu sa'u ikarakuri ywete mãe kõ votã peiko, pepãtavõ iporijau mãe kõ remẽ. Oroeraa penemime'ẽ rã ime'ẽ ijupe kõ remẽ, omoe'e ywetetã Janejare'e penewarã mõ kupa. ¹²Ãwĩvo Janerõvijã koty rewarã kõ pepãtavõ remẽ, niporijau'ãi kupa ky'y. Oy katutã emiporu rã kõ ijupe kõ. Omoe'e ywetetã Janejare'e peupewarã mõ ãmẽ kupa. ¹³Napekãte'ãi ee mã'ẽ rẽ omã'ẽ kupa remẽ, kee e'itã kupa: "Aje ywete Kiristu ayvu rupi katu tẽ ekoi kupa ipi", e'itã ãmẽ kupa. "Ãwitõ janepãtavõ kupa, ãwĩvo ve ãmõ kõ ve opãtavõ kupa ipi", e'itã peupewarã mõ ãmẽ kupa. Ajare omoe'e ywetetã Janejare'e penewarã mõ kupa. ¹⁴Penauvaytã ãmẽ kupa. Ajawyi kee e'itã Janejare'e pẽ peupewarã mõ kupa: "Janejare'e, eporijauesa Korĩtu wãnã kõ, ikatuay wete orerereko kupa rewarã mõ. Nokãte'ãi teve okarakuri rẽ omẽ'ẽ oreupe kupa remẽ ipi. ãmõ, aje ywete poroporijauesa ywete kupa ipi", e'itã Janejare'e pẽ kupa. ¹⁵Simoe'e Janejare'e wemime'ẽgwerã janeupewarã rewarã mõ. A'e ywesõ nokãte'ãi jane mã'ẽ rõmõ ekoi ipi.

"Jesu remimonokwerã tẽ ije", e'i mã'ẽ

10 ¹Ije, Pauru, eayvukasitã peupe ky'y. Aje, Kiristu okãte'ã janere ipi. Ikatusa rupi janerereko ipi. Nijanererekoivai teve ipi. Eruparã rõmõ ãwĩvo apota poroereko ipi. Ajamã'ẽ pepytery pewarã kõ mõ kee e'i tite eupewarã mõ: "Pauru janepyri ekoi remẽ, ikatusa rupi oporegeta janeupe ipi. Age'e kuipe'e ekoi remẽ, ojimomojy tesõ kareta kusiwarerã rupi ky'y", e'i tite eupewarã mõ kupa ipi. ²Aje, eayvukasi ekareta rupi pejë. Ajamã'ẽ aa pepyri remẽ, napotai ajimomojy rõmõ penovake aiko. Aje, eayvukasitã, kee jaa akuwa rewarã mõ. Ava mõ sõ kee e'i remẽ, "Pauru opota tẽ ojimoe'eoka jane kõ pẽ", e'i sõ remẽ, ivo ve aovaja kõ jẽtã ãmẽ. "Ãwĩvo kuwasi aiko mijã!" na'ei aiko ajamã'ẽ. Naãrõi a'evoa aiko ipi.

³Sota rewarã rẽ tẽ poromosã'ãgatã tapekuwa sa'u. Sota kõ okasia e'e rẽ tẽ ojimokasi iko kupa ipi. Ore, orevo rupi teve ajamã'ẽ. Oreakasia rupi rõwã oroiko ipi. ⁴Sota kõ oo jiapisia pẽ remẽ, irapa rapa tẽ oo kupa ipi. Na'evoi ore oroiko. Raparã rẽ rõwã orojimokasi ipi. Janejare'e kasia oreraparã vo 'ejẽ oreupe ikasi. A'e ywesõ ikasi sota kõ raparã wyi ipi. A'e rupi jane kõ ayvukasia kõ noromokasiokai ipi.^d Oroayvumooapaoka teve ojipy'amogeta tite mãe kõ ipi. Ajawyi Janejare'e kasia rupi tẽ ojiayvuvaja vaja mã'ẽ oromoma kuwa, noerovija tari mãe kõ ayvu ai oromogwe kuwa. ⁵Okasia rupi, otekokuwaa rã'ãga rupi Janejare'e ayvu nomoe'ei mãe kõ ayvu ve oromogwe kuwa. A'e wyi wetesi Janejare'e kasia rupi a'evoo roereko, ãwisõ Kiristu rẽ tojirovija iko kupa ky'y.

⁶Ajare kee a'e pejë. Kiristu ayvu rupi katu ikõ tapeiko nẽ. Ijavyu rupi noiko tari mãe kõ oromomorijautã ãmẽ.

^c 9.10 Isa. 55.10 ^d 10.4 Eps. 6.10-18

⁷Manyvore ãmõ kõ vo jẽ erereko pekupa! “Jesu remimonokwerà tè Pauru”, napejẽi eupewarà mõ. Maevo ikujaukwerà rupi aiko rewarà mõ. Ajamãẽ aje ywete Kiristu koty rewarà kõ tè pejẽ remẽ, ekuwa kuwa pekupa mijã. “Aje ywete Kiristu koty rewarà tè ãwĩ”, pejẽ kuwa ije mijã.

⁸Kee a'e pejẽ remẽ, “Janerõvijã ywete epyteporo pemotekokuwaarã rõmõ taiko”, a'e pejẽ remẽ, maevo penovake ajimoe'e maevo sõ tite aiko ipi. Ajamãẽ ãwivoa rè najimosiõkai, aepe a'e pejẽ remẽ. Kiristu tè epyteporo toporomokasi ijayvu rupi taiko, ãwisõ tapejirovija ywete ee peiko. A'evoa rõmõ tè oremonooka pekoty. Pemojaiwea rõmõ rõwã oremonooka pekoty. ⁹Napotai ajimomojy pene ekareta kusiwarerã rupi mãẽ. ¹⁰Ãmõgwerã kee e'i tite eupewarã mõ: “Kareta kusiwarerã rupi Pauru ojimomojy wete janere ipi. Ojimokasiay. Ajamãẽ janepyterã rupi ekoi remẽ, ojimomeme tè iko ipi. Nijayvukasi ãmẽ iko”, e'i tite maevo eupewarã mõ kupa ipi. ¹¹Ajawyi kee a'e aepe e'i mãe kõ pè. ãwitõ kareta kusiwarerã rupi eayvukasi pejẽ, ãwivo vetã ajo pepyri remẽ. Netee'ãi ãwĩ wyi aiko, a'e pejẽ.

¹²Pepytery pè uve kee e'i mãe kõ: “Jane ywesõ jatekokuwa Pauru kõ wyi”, e'i tite mãe kõ. Ajamãẽ ovote ojupe tè aepe e'i ywe'e tite iko kupa. Otekokuwa e'ãa rupi tè aepe e'i kupa. [Janejare'e ayvu rupi rõwã aepe e'i iko kupa.] Ajawyi aepe jaa napotai, aepe na'ei ije rewarã mõ. ¹³Janejare'e noremonookari sõ pekoty remẽ, “Janejare'e kasia rupi tè jane kõ simoe'”, noro'e'ãi kuwa pejẽ. Ajamãẽ aje Janejare'e tè oremono rewarã mõ tè, ijayvukwerã rupi tè oroo pekoty. Ajawyi tè, “Janejare'e remimonokwerã rõmõ tè oroiko”, a'etã pejẽ. ¹⁴Oroo pekoty remẽ itõkõ, “A'evõ ikõ peiko nè”, e'i Janejare'e oreupe mãẽ noroapyrasai ipi. E'i mãẽ pe'ĩ kõrijõ oroereko ipi. ãwĩ tè oremono pekoty rewarã mõ, ijayvu Kiristu rewarã rè tè poromotekokuwa oroiko. Ajawyi norojimoe'e teywetei oroiko ipi. ¹⁵Ãmõ kõ ve itõkõ pemotekokuwa Kiristu ayvu rè ipi. Ajawyi kee noro'ei pejẽ: “Ore rõmõ'ite Kiristu pewarã kõ oromotekokuwa”, noro'ei oroiko ipi. Kee ywesõ oropota peiko. Janejare'e rè pejirovija katu remẽ ywesõ pejirovija ywetea oropota. A'evõ remẽ ywesõ Kiristu ayvu rè ore poromotekokuwa katuaytã oroiko ipi. Penena jãvijõ jẽ poromotekokuwatã ãmẽ ky'y, Janejare'e e'i oreupe maekwerã pe'ĩ, oro'e ãmẽ pejẽ oroiko. ¹⁶Ãmẽ awyjepa Janejare'e ayvu e'ea'y Kiristu rewarã oromojenu penena pè remẽ, orojisry kuwa ajaire oroo ãmõ tena kyty. Uve jẽ tena kõ a'e pè Janejare'e rewarã nojenuive ijupe kõ mãe kõ. A'e taa kõ gyty oropota oroo ijayvukwerã mojeny erokwa. Noropotai ãmõ kõ remimoe'ekwerã kõ oromoe' jẽ, noropotai ãmõ kõ omoe' maekwerã kõ rè orojimoe'e rewarã mõ. ¹⁷Ajare kee ojikusiwapa Janejare'e ayvukwerã rõmõ: “Ava mõ sõ opota ojimoe'e remẽ, kee te'i kõrijõ: *Janejare'e remireko katuarã rõmõ tè ije aiko*, te'i kõrijõ *ojimoe'e ãmẽ*”, e'i maekwerã.^e ¹⁸Ovote ojimoe'e mãe pè rõwã temimoe'e taoty ãmẽ. Aje ywete Janejare'e remimoe'e pè tè temimoe'e taoty.

^e 10.17 Jer. 9.24

Poromo'earà rā'āga kō rewarà

11 ¹Eawyry mǎ'ē vo tesō aju ajupa, akusiwatà remē ky'y. Ajawyi tapenerekoiva e'ā eayvu, eawyry mǎ'ē ayvu vo peenu eayvu remē. ²Epy'a jikōtevē tesō pene aiko. Āwitō Janejare'e ipy'a jikōtevē janere iko ipi, āwīvo ve penuu vo jē ije aiko rewarà mō, epy'a jikōtevē ywete pene aiko. Āwitō janerajyry tempōru e'ā, āwīvo ve pejē eupe. Okāte'ā mǎ'ē vo 'ejē ije, pe'ī mǎ'ē rerekwarà rōmō tapeiko. Āwitō tuu ome'ē wajyry kōjāmukukyry ivo katuay wete mǎ'ē rōmō imēnà pe'ī mǎ'ē pē tē, āwīvo porome'ētà pe'ī mǎ'ē pē teve, a'e Kiristu pē porome'ētà. Ivo katuay wete mǎ'ē rōmō apota peikoa. Āwīvo apota Kiristu rē pekāte'ā peiko ipi. ³Tapejmoripeoka e'ā ikō poromo'e rā'āga mǎe kō pē nē, a'e pejē. Āwitō karamoe remē sa'i Eva ojimoripeoka moe tekokuwaa rā'āga pē, tāwīvo e'ā ikō peiko nē, a'e pejē.^f Napotai Kiristu wyi pepoi ywe'e tite pejmoripeokaa rupi peiko mǎ'ē. ⁴Jesu rē poromo'e rā'āga mǎe kō āmō rupi tē omojenu pejē kupa ipi. Oreremimojenuwerà vo rōwā omojenu pejē kupa. Ajamā'ē a'e kō ayvu peenu remē, penory tite āmē peiko ipi, āwisō Janejare'e 'Āg rupi rōwā pemo'e rā'āga kupa remē. Āmō 'āg rupi teipe pemo'e rā'āga kupa ipi. A'e kō poromoripe mǎe kō rōmō tē ekoi. Janejare'e ayvu e'e wekovijanō rā'āga āmō ayvu pē tē kupa. “Janejare'e ayvu tē oromojenu”, e'i rā'āga kupa ipi. Ajamā'ē iwarite kupa. ⁵“Ore ywesō Jesu remimono kō rōmō oroiko”, e'i tite ojimojōvijā rā'āga pe'arà kyty iko kupa. Ajamā'ē a'e kō ywesō rōwā ewyi. ⁶Maevo ikujaukwerà rupi rōwā aporegeta pejē ipi. Ajamā'ē Janejare'e ayvu rē atekokuwaway mǎ'ē tē ije. Āwīvoa pekuwa. Pemā'ē itōkō orere ipi, kō'ē jawe jawe itetejē oroposiko katu ipi remē.

⁷Poromotekokuwa Janejare'e ayvu rē remē itōkō, kee na'ei pejē ipi: “Janejare'e ayvu mojenua repykwerà tapeme'ē ije”, na'ei pejē ipi. Najimojōvijāokai teve itōkō pene aiko ipi. Temīgwai vo 'ejē aposiko tepy e'āte peneve ipi. Tepy e'āte aposiko rewarà mō tē sipō napeenui eayvu peiko? ⁸Poromotekokuwa aiko remē itōkō āmō Jesu koty rewarà kō mō tē karakuri omuroka eupe ipi mijā. A'evo tē itōkō karakuri apy ipi. A'evo remē pemotekokuwaa repykwerà rōmō rōwā aposiko pepytery pē aiko. ⁹Poromo'e ypy aiko remeve itōkō, naporanui aiko pejē ipi, āwisō eporijau ipe aiko remē. Jesu koty rewarà kō Masetonia vvy pe wyi uu remē, weru eporijau ee mǎe kō pirujē eupe kupa. Jypy remeve a'evo aiko. A'evo jē tē age'e aiko. Ajawyi naporanui pejē ipi.^g ¹⁰Akaja vvy rupi a'evo aiko ipi, pirujē taa kō pē aiko remē. Kiristu rovake aje ywete aepo a'e. Tepy e'āte poromotekokuwa Janejare'e ayvu rē remē, eupe ikatuay. Ajawyi ava pē jē rōwā aporanu ipi. ¹¹Manyvore rōwā naporanui pejē aiko. Noporoau

^f 11.3 Jinō. 3.1-5,13 ^g 11.9 J.K.R. 16.23

rewarà mō rōwā naporanui peupe! [Napotai imowasu peupe rewarà mō tē naporanui peupe!] Poroauvay rewarà mō teve a'evo oroiko! Janejare'e okuwa a'evo oreikoa.

¹² Aekwery vo jē tē aikotā. Janejare'e ayvu rē tepy e'āte poromotekokuwa ipi māl'ē rōmō tē aiko. Namotee'āi āwīvoa. Kee rewarà mō. Poromo'e rā'āga mēe kō kee e'i ipi: “Janejare'e remipyteporokwerà kō teve ore oroiko, Pauru vo”, e'i rā'āga kupa ipi. Ajamā'ē orevo rōwā a'e kō ekoi, apijarà kō rōwā ore rewarà mō. [Epykwerà rupi tē oposiko iko kupa ipi. Noposiko'āi tepy e'āte kupa ipi. A'evoa rupi ojikuwa evo rōwā mēe kō rōmō iko kupa.]

¹³ Kiristu remimonokwerà rā'āga tē a'e kō. Poromoripe mēe kō tē. Iwarite Kiristu ayvu mojenua e'e kō rōmō maevo sō tite ekoi kupa remē. ¹⁴⁻¹⁵ A'evo ekoi kupa remē, oōvijā Satanasi reruparà mō tē ekoi kupa ipi. Āwitō ājāgai rōvijā Satanasi poromoripe ipi. Ivo rā'āga ekoi ipi. “Janejare'e remīgwai tē ije”, e'i rā'āga poromoripea rōmō ipi. Āwīvo 'ejē poromo'e rā'āga mēe kō ekoi ipi, eruparà mō. Ajamā'ē karamō Janejare'e wepyme'ē kōtā, ekoawerà aiwerà kō rupi katu.

Pauru jimomorijaua rewarà

¹⁶ Pemā'ē rā'ī! Eawry māl'ē vo terereko e'ā pekupa. Aepo a'e py'yi tesō pejē aiko ky'y. Ajawyi aepo pejē eupe remē, tapeenu jēsi eayvu. Eawry māl'ē ayvu vo 'ejē ipe mijā. Āwīvo aiko remē, ajimoe'etā peneminu rōmō aiko ky'y. ¹⁷ Aje Janerōvijā ywete ayvu rupi rōwā ejimoe'ea rē aporegetatā pejē. Aje ywete eawry māl'ē vo 'ejē maevo sō tite aporegetatā pejē aiko ky'y. ¹⁸ Āmō kō mōa'ārōwā aje ojimoe'e teywete weko rē iko mēe kō. A'evo remē, “aje ywete” pejē tite ijayvu kō pē peiko. Ije ve ajawyi ta'evo aiko ky'y. Ajimoe'eoka tary ve peupe ky'y. ¹⁹ Otekokuwa māl'ē vo ipe pejē. Ajamā'ē eawry mēe kō ayvu rē penory jē peiko. “Aje māl'ē tē” pejē ywe'e tite ijayvu kō pē ipi. ²⁰ Āwisō pemoaia teipe remē, peenu katu jē ywe'e tite ijayvu kō ipi. Wayvu pupe tē penereko ipe kupa ipi. Pemoma 'ete ipe karakuri pemoripea rupi. Penerōarō ipe kupa ipi. Penereko ai epe kupa ipi. [Manyvore ywete pō peenu jē tesō ijayvu kō āmē!] ²¹ Ajamā'ē ije najimōjōvijāokai peupe aiko ipi. Ajawyi, “Nikasi Pauru ayvu”, pejē tite eupewarà mō ipi.

A'e kō ojimoe'e ywete remē, peenu katu ijayvu kō ipi. Āwīvo remē sipō pepota? Ajawyi ta'evo aiko ky'y! Aje eawry māl'ē vo 'ejē aporegetatā pejē ky'y! [Āwīvo remē maevo peenutā eayvu āmē ky'y!] ²² Kee ta'e ajawyi. Epereu ayvu rupi oporegeta mēe kō tē kupa remē, a'evo ve ije. Epereu ayvu rupi aporegeta māl'ē teve ije!^h Isaeu jeapyrerà tē kupa remē, a'evo ve

^h **11.22** Epereu kō eu teve Juteu kō pē. Epereu eu teve ijayvu kō pē. Isaeu jeapyrerà kō teāmā Juteu kō.

Isaeu jeapyrerà teve ije! ãmõ, tãmõ Aparão jeapyrerà tè kupa remẽ, a'evo ve tãmõ Aparão jeapyrerà teve ije! ²³ Kiristu remĩgwai rãmõ oposiko kupa remẽ, ije teve aposiko a'e rãmõ aiko. Ajamã'ẽ ije ywesõ aposiko iwyi kõ aiko. (Agyvo aporegeta remẽ, eawryy mã'ẽ ayvu vo tesõ aporegeta ky'y. Ajamã'ẽ nimanyvoi eupe.) Aje iwyi kõ wetesi aposiko aiko ipi. ãwĩvo ve ije ywesõ teve emopã'ã erereko kupa ipi. Iwyi kõ wetesi enõpã tè erereko kupa ipi. Iwyi kõ wete ve werywete ejuka kupa ipi.ⁱ ²⁴ Agyvo aiko Kiristu remĩgwai rãmõ aiko. 5 rãmõ tesõ kõ Juteu kõ epyy enõpã nõpã, teima pirerã jimõjãgwerã pupe. A'evo ve enõpã nõpã kupa remẽ upi upi, 39 rãmõ tesõ enõpã kupa ipi!^j ²⁵ ãmõ kõ, Romã pewarã kõ enõpã nõpã vyvra pupe. Moapy tesõ a'evo erereko kupa. ãmẽ kõ pe't'lyte ejapi japia takuru pẽ kupa. ãmõ, nawiu rupi aa remẽ, ojipypy ereve. Moapy teve a'evo aiko. ãmõ remẽ kõ orojipypy remẽ, pãranã pipo pipokwerã rupi ekõ'ẽma tè. Ajaate karumẽ arokwapa pãranã pupe aiko.^k ²⁶ ãwĩvo ajimomorijau taa kõ rupi aa aa aiko remẽ ipi. Yy erevuru remẽ kõ werywete emomarama. ãmõ remẽ kõ, imona mãe kõ werywete emomarama teve, pee rupi aa aiko remẽ. ãmõ remẽ kõ, eretãrãgwerã kõ yeve tesõ emomarama. ãmõ remẽ kõ, Juteu rãwã mãe kõ ve werywete emomarama. ãwĩvo ajimomorijau aiko ipi, taa kõ rupi akwa remẽ. Tekoe'ãma rupi teve a'evo aiko ipi. ãmõ, pãranã wasu mytery pẽ a'evo aiko teve. ãmõ, Jesu koty rewarã rã'ãga kõ po pẽ ajimomorijau teve aiko.^l ²⁷ A'evo 'evo aiko ipi. Aposiko ywete aiko ipi. Ajimomorijauvey teve aiko ipi. Ijaty tesõ nakei ipi. Jareve reve tesõ ekõ'ẽ kõ'ẽma aiko ipi. Amyay aporara teve tesõ aiko ipi. ãmõ, 'ywa aporara teve aiko ipi. Eporijau tè ake. Eremi'õ naikoi 'ete teve eupe. ãmõ, eretã naikoi teve. ãmõ, eyru naikoi teve ipi. [Pe'typte rãwã ãwĩvo aiko ajamã'ẽ. Kiristu remĩgwai rãmõ tè a'evo ajimomorijau aiko ipi. ãmõ kõ sõ a'evo ekoi remẽ, opoipa kuwa oposikoa wyi kupa mijã.]

²⁸ Agyvo aiko teve aiko ipi. Jamã'ẽ ee mã'ẽ rupi kãrijõ rãwã ajimomorijau aiko ipi. Nijamã'ẽi ee mã'ẽ rupi teve ajimomorijau aiko ipi. Jesu rẽ ojirovija mãe kõ rẽ ajipy'amogeta ywete aiko ipi, pirujẽ taa kõ pewarã kõ rẽ, nakuwai manyvo ekoi kupa ky'y rewarã mõ. Kõ'ẽ jawe jawe ajipy'amogeta ee kõ aiko ipi. A'evoa rẽ ajimomorijau teve aiko ipi. ²⁹ Jesu koty rewarã kõ mõ nipy'a kasi remẽ, eãgyoay ee kõ aiko ipi. ãmõ, ikoty rewarã kõ mõ ovoarã pẽ ojavyoka ijayvu remẽ, eãgyoay teve ee kõ aiko, aavay kõ rewarã mõ. ãwĩvoa rupi teve ajimomorijau aiko ipi.

³⁰ [Atryy kõ omã'ẽ ere,] evote najimokasi aiko remẽ. Ajawyi a'evo 'evo aiko maekwerã rẽ kãrijõ tè ajimoe'tã aiko. Evote ekasia rẽ rãwã

ⁱ 11.23 J.K.R. 16.23 ^j 11.24 Juteu kõ poronõpã nõpã remẽ, ekoa kõ tè 39 rãmõ tesõ kãrijõ tè poronõpã nõpãtã kupa ipi, eminõpã nõpãgwerã tomãno e'ã. ^k 11.25 J.K.R. 16.22; 14.19
^l 11.26 J.K.R. 9.23; 14.5

ajimoe'età aiko. ³¹ Janejare'e okuwa ewari rōwā aepo a'e mā'ē. A'e, Janerōvijā Jesu Ruu. A'e ywesō temimoe'e rōmō ekoi mā'ē tē. ³² [Jypy remē epikasi e'āa Janejare'e omojisaoka eupe,] Tamasiku taa rupi aa aiko remē. Kee. Kovenatu tē tesō kō opota epyy mijā. Jōvijā Areta ayvu rupi kovenatu rōmō ojinō maekwerà itōkō a'e. A'e tē a'evō erereko. Taa okenaa sota kō erārōarà rōmō kupa upa, kovenatu ayvu rupi tē epyytà kupa mijā. [Manyvo najireko'āi ajava iwyi kō āmē mijā.] ³³ Ajamā'ē Jesu koty rewarà kō epātāvō tajisyry tyvija rupi aa a'e taa pe wyi. Emowyjy rykyry wasu mā'ē pupe, emojava emono kupa. Ijokenaa ikwa mā'ē mō rupi emono kupa.^m Ajawyi najipyokai ijupe kō. [Āwīvoa rupi Janejare'e omojisaoka epikasi e'āa eupe. Ajawyi akuwa evote nekasi aiko.]

“Nekasi aiko remē ywesō si Kiristu emokasioka”, e'i mā'ē

12 ¹ Napotai epe erewarà rē ajimoe'e aiko ipi. Ajamā'ē ajimoe'e jē pene aiko, āwisō nimanyvo'āi epe remē. Janerōvijā ywete omojisaoka eupe mā'ē amome'utà pejē. ² Jypy remē, [Janejare'e reve aporegeta ajupa remē,] emovy ereraa rā'ī tē yva pupe. Wena kyty tē tesō ereraa. ¹⁴ kwaray rōmō tesō arokwapa a'evō ereraa paire. Maevo e'āg kōrijō tē weraa yva kyty. Āmō, epirā teve maevo weraa. Ije ajamā'ē nakuwai epirā revejē ereraa remē. Janejare'e kōrijō tē okuwa. ³⁻⁴ Akuwa Janejare'e ereraa, a'e wena ikatuay mā'ē kyty. Ma'e remē aje a'evō. Ma'e remē apouvai tē. Nakuwai. Janejare'e tē okuwa. Ayvu katuay wete tē tesō aenu a'e kyty wyi ajo. Ava nomome'u kuwa'āi aenu maekwerà. ⁵ Āwīvo aiko maekwerà rē ajimoe'e kuwa aiko āmē. Ajamā'ē najimoe'ei aiko. Epikasi e'āa rē kōrijō tē ajimoe'e aiko. [Jesu kasia rupi kōrijō aiko mā'ē rē kōrijō ajimoe'e aiko.] ⁶ Apota sō ajimoe'e remē, aje ywete mā'ē rē kōrijō tē kuwa ajimoe'e aiko. Eawyry mā'ē vo rōwā kuwa ajimoe'e āwīvo aiko remē. Ajamā'ē napotai ajimoe'e penovake aiko mā'ē. Pemā'ē manyvo aiko pepytery pē aiko remē ipi. Peenu teve poromotekokuwa ajupa remē ipi. Penemikuwa rupi tē apota emosā'āga pekupa, ajawyi.

⁷ Aje, Janejare'e omojisaoka ikatuay wete mā'ē eupe. Ajamā'ē nopotai ajimoe'e ywe'e tite aekwerà rē aiko. Ajawyi ayay mā'ē omonooka ije taporu. Āwitō Satanasi remimuu emomorijauvay sō remē, āwīvo ajimomorijau ayay mā'ē rē aiko. ⁸ Kee a'e ipe Janerōvijā ywete pē: “Emokatu rejupa!” a'e ipe ijupe ipi. Moapy tesō aepo a'e tite ijupe. ⁹ Ajamā'ē kee e'i ije: “Ānī. Noromokatu'āi. Ajamā'ē moko oroerekooka ipe remē, oroauvay jē aiko. Noroity'āi teve aiko. Nanepikasi remē ywesō sitō ekasia ikasiaytā neupe āmē”, e'i ije. Ajawyi nekasi epe aiko remē, erory jē aiko. Ajimoe'età epikasi e'āa rē aiko āmē, āwīvo remē ywesō Kiristu kasia rupi tē aikotà ky'y rewarà mō. ¹⁰ Ajawyi erory jē aiko ipi, āwisō nepikasi

'ete ipe aiko remē. Āmō kō ererōarō ipe remē, na'e'i ajamāē ijupe kō āmē ipi. Erory jē aiko ipi. Āmō, ajimomorijau ipe aiko remē. Āmō, emomoriijau ipe kupa remē. Āmō, waypea rupi aiko ipe remē. Manyvo nyvo jē aiko ipe Kiristu koty rewarā rōmō aiko remē, erory jē aiko ipi. Nepikasi aiko remē ywesō si Kiristu emokasioka erereko ipi, ajawyi.

Pauru ojipy'amogeta ywete Korītu wānà kō rē remēwarā

¹¹Aje, eawry māē ayvu vo 'ejē maevo sō tite aiko, ivo aiko māē rē ajimoe'e remē. Penewarā mō tē a'evo aiko ajamāē. Pejē ywesō kuwasi emoe'e pekupa mijā. Āmō kō ywesō rōwā ewyi, āwisō, “Ore ywesō Jesu remimono kō rōmō oroiko”, e'i epe pejē kupa remē. ¹²Janejare'e tē itōkō okasia omojisaoka pejē, pepytery pē aposiko aiko remē. A'eva rupi itōkō emojikuwaoka wemimono e'e rōmō taiko. Waypea rupi aiko remē itōkō, ajimokasi jē aposiko pepytery pē aiko ipi. Ajawyi ekuwa kuwasi Jesu remimonokwere'e rōmō pekupa mijā. ¹³Āmō, Jesu koty rewarā kō rena kō rupi aiko remē, a'e wānà kō oma'e mō ome'ē eupe ipi. Ajamāē pepyryvo aiko remē, naporanui pema'e rē ipi. Ajamāē āwīvo ipe aiko pepytery pē remē, manyvore pōkō pejē ywe'e tite eupewarā mō: “Pauru nijanepota ywe'ei. Āmō kō ywesō opota katu janewyi”, pejē ywe'e tite eupewarā mō. Pema'e rē sō aporanu remē, ikatu kuwa pejē mijā. Emoe'e kuwa pekupa āmē mijā.

¹⁴Mōrijō tesō aa penesa mijā. Age'e apota mijē aa penesa. Ajamāē aa remē, eoa repykwērā rē naporanu'āi pejē, “Tiwaype e'ā ijupe kō”, a'e peupewarā mō rewarā mō, poroauvay aiko wyi. Eākarā vo 'ete pejē. Ajawyi apota teve erauvay pekupa. Emāē. Āwitō tuu tē oja'a wākarā kō rē ipi. Ajawyi, “Peja'a kuwasi ere”, ne'i ijupe kō ipi. “Aja'atā pene”, e'i ijupe kō. Āwīvo ve ije. Ajawyi pema'e kō mō rē naporanu'āi. ¹⁵Eroryvay pirujē emoma'e kō ame'ēma kuwa jimo'yjē, pepātavōa rōmō remē. Poroauvay rewarā mō, emoma'e pirujē kuwa ame'ēma [āwisō Jesu Kiristu rē tapeja'a] mijā. Apota poromokasi ipi rewarā mō, emānōa wyi nakyjei aiko. Āwīvo poroauvay aiko rewarā mō sipō nerau ywe'ei pekupa? ¹⁶Karakuri mō jē rōwā itōkō apyy pewyi. Manyvore pō poromoripe māē vo 'ejē erereko jē pekupa? ¹⁷Nerako'i 'eteay itōkō pene aiko ipi. Amono ypy pekoty mae kō teve itōkō naeako'i pene iko ipi. Napemoripei penereko kupa ipi. ¹⁸Titu itōkō napemoripei penereko, amono pekoty remē. Āmō eremimonokwerā teve itōkō napemoripei, Titu rupi oo maekwerā. Evo jē naeako'i itōkō pene kupa. Ojevo jē itōkō oroiko.

¹⁹Maevo kee pejē tite ekareta pemogeta remē: “Ojireko katu Pauru kō age'e simo'y ee māē wyi”, pejē tite maevo ije. Ānī! Na'evō'āi aiko. Orep'y'a pewarā Janejare'e okuwa katu. Pirujē Kiristu e'i oreupe toromojenu peupe māē tē oromojenu pejē ipi. Ajawyi kee jaa tapekuwa, ejimorypa katu kō. Pirujē manyvo nyvo jē oroiko remē, pemokasia kō rōmō tē oroiko ipi.

A'evo oroiko mā'ē tē ore. ²⁰Ma'evō avāe moko'pe remē, ije tē āmō rupi tē amā'ētā pene. Ma'evō eremimotarā rupi rōwā poroesatā avāe. Ije ve penemimotarā rupi rōwā eresatā pekupa āmē. Ma'e remē agyvo sikaepo peiko ipi. Peayvu teitete sikaepo ojiupe peiko ipi remē. Pejimoa'u teve sikaepo ojeeve peiko. Āmō, pejikō'ō teve sikaepo ojeeve peiko. Āmō, pejimo'e'y e'yi sikaepo ojiwyi peiko. Āmō, peayvu ai teve sikaepo ojiupe peiko. Āmō, pejimovyvyrai tē sikaepo peiko. Āmō, pejimo'e'e tite sikaepo peiko. Āmō, peiko teitete teve sikaepo peiko. A'evō 'evo ma'evō sikaepo peiko remē. ²¹Ma'e remē kee peiko mā'ē rōmō poroesatā avāe remē. Ma'e remē napeityi 'eteay peaiwererā wyi, karamoewarā wyi. Ma'e remē aekwerā ve jē peiko. Pejipy'amoky'a jē peaiwererā rē peiko. Pejimomy'a jē peiko. Napejimosioka miti ma'e remē peaiwererā rē peiko. Pejimoane'e jē ee peiko. A'evō sō peiko remē, emoāgyoaytā pekupa āmē. Ma'evō emoja'o ywetetā pekupa āmē, Janejare'e reminu rōmō. Āmō, penewarā mō ajimosioka tevetā Janejare'e rovake aiko, poromoe'e pānē āmō kō reminu rōmō rewarā mō.

“Tapetekokuwa peiko”, e'i mā'ē

13 ¹⁻²Aa penesa remē itōkō, mōrijō rōmō tesō aa. Kee a'epa itōkō nivoi māe kō pē, pepytery pē aiko remē: “Ivo tapeiko. Peaiwererā tapeityypyypipa awyje”, a'epa itōkō pejē. Āmō, “Jesu revejē jaiko remē, janeaiwererā rē nijajirojivyi mijē japosiko ipi”, a'epa itōkō pejē. Mōrijō rōmō aa penesa remē itōkō a'evō rē aporegetapa pejē. Age'e remē, ke'irōwā aiko pewyi ky'y. Ajawyi āmō remē, aa mijē pekoty remē, “aje ipo” na'e'āi pejē ky'y. Noporoporijauesa'āi teve āmē ky'y, moapy rōmō tesō aa ky'y rewarā mō. Kee e'i Janejare'e ikusiwaoka maekwerā rupi katu poroerekotā: “Nivoi mā'ē jamo'ytā ava mō rē remē, pe'ite mā'ē remikuwa rupi rōwā ta'evō. Mōrijō e'i mā'ē remikuwa rupi tē ikō 'aje' taoty nē. Moapy rōmō e'i mā'ē remikuwa rupi teve. Ta'evō kōrijō ikō peiko nē”, e'i maekwerā.”ⁿ Ajawyi aekwerā rupi katu poroerekotā ky'y. ³Āmē a'evō poroereko remē, pekuwatā Kiristu ayvu rupi tē aposiko ajupa. Ajawyi “aje” tapejē eupe ky'y. Kiristu kasia rupi tē poroerekotā ky'y. Nikasi mā'ē rōwā Kiristu. Aje ikasiay wete mā'ē tē. Okasia omojisaokatā pepytery pē āmē. ⁴Vyvyra jipokana rē itōkō omopotuputuri ijuka kupa. Nikasi mā'ē vo 'ejē wereko kupa. Ajamā'ē Janejare'e kasia rupi tē opoera mijē oiko mijē rōmō. Age'e si awyje oiko jē oiko ky'y. Āwīvo ve ore, Kiristu reve pe'īpyte mā'ē rōmō. Norepikasi epe oroiko. Ajamā'ē Janejare'e kasia rupi tē oroiko. Ajawyi oroo mijē pepytery pē oroiko remē, Janejare'e kasia rupi tē poromosā'āgatā ky'y.

⁵Ajawyi tapejimosā'āga amātejē esa. Aje ywete pōkō Jesu Kiristu rē pejirovija katu? Napekuwai sipō Jesu Kiristu 'Āg pepy'a pupe ekoi, aje

ⁿ 13.1 T.M. 19.15

ywete pejirovija ee remē? Napejirovijai ee remē tē katutà, naiko'āi. ⁶Aje ywete pejirovija ee remē, pekuwatà ore ve aje ywete upi oroiko. Oropota a'evoa pekuwa. ⁷Janejare'e pè oroporegeta peupewarà mō remē, kee oro'e oporegeta ipi: “Emokasi kō oterē jē neremimota rupi toiko kupa. Nivoi toiko e'ā kupa”, oro'e ipi. Kee noro'ei: “Oremojikuwaoka ivo katu poromotekokuwa mǎe kō rōmō rejupa”, noro'ei. ⁸Oropota aje mǎ'ē tē tojimo'ypa. A'e rupi poromosā'āgatà, aje nivoi peiko remē, aje ivo peiko remē. ⁹Janejare'e ayvu e'eay rē pejimokasia ywesō oropota. Ajawyi nimanyvoi oreupe norekasi pewyi remē. Orerory āmē pene oroiko ipi. Ajawyi kee oro'e Janejare'e pè peupewarà mō ipi: “Papa yvapewarà, nekasia eme'ē Korītu wānà kō pè, age'e remē ywesō tojirovija ywete nere kupa”, oro'e peupewarà mō ipi. ¹⁰Ajawyi aā kareta akusiwa tapemǎ'ē ee, naaive pekoty remeve. Ajawyi kareta rupi tē poromogetatà, kuise'ē tapepoi amātejē peaiwererà wyi, āwīvo mǎ'ē tē. Āmē tē avāe pepyri remē, noporomogeta mijē'āi a'evoa rē aiko ky'y. Janerōvijā ywete tē eayvumokasioka. Ajamǎ'ē pemokasia rōmō tē eayvumokasioka. Pemoaia rōmō rōwā eayvumokasioka ipi.

Kareta moawyjepaa

¹¹Aepo kōrijō tē akusiwa pejē ajupa, eretārāgwerà kō. Tapejimokasiay wete age'e remē ywesō Janejare'e ayvu rupi katu tapeiko, a'e pejē. A'evoa rē tapejimokasi ojee peiko. Pe'īypyte mǎ'ē rōmō tapeiko. Tapepy'a piryvypy katu kōrijō peiko ipi. Janejare'e peneve ekoitā āmē, penauparà rōmō, pepy'a mokatuarà rōmō. ¹²Āmō, tapejimory katu ikō ojeeve Jesu koty rewarà kō rōmō peiko ipi nē, pejirovāe remē upi upi.

Pirujē ikewarà kō Jesu koty rewarà kō opota ojimory pene aā kareta rupi.

¹³Janerōvijā Jesu Kiristu ikō tapenereko katu okatuaya rupi ipi nē. Āmō, Janejare'e ikō tapenaupay wete teve penereko ipi nē. Āmō, i'Āg rupi ikō pe'īypyte mǎ'ē rōmō tapeiko ipi nē. [Aepo a'e kōrijō tē eremikusiwarerà rupi pejē. Awyjepa.]